

D.R. 38/2006

RANG UNDANG-UNDANG

bernama

Suatu Akta untuk meminda Akta Koperasi 1993.

[]

DIPERBUAT oleh Parlimen Malaysia seperti yang berikut:

Tajuk ringkas dan permulaan kuat kuasa

1. (1) Akta ini bolehlah dinamakan Akta Koperasi (Pindaan) 2006.

(2) Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta* dan Menteri boleh menetapkan tarikh yang berlainan bagi permulaan kuat kuasa peruntukan yang berlainan Akta ini.

Pindaan tajuk panjang

2. Akta Koperasi 1993 [*Akta 502*], yang disebut "Akta ibu" dalam Akta ini, dipinda dalam tajuk panjang, dengan menggantikan perkataan "untuk menggalakkan perkembangan koperasi dan bagi perkara yang berkaitan dengannya" dengan perkataan "untuk menggalakkan perkembangan koperasi mengikut nilai-nilai kejujuran, kebolehpercayaan dan ketelusan koperasi bagi menyumbang ke arah mencapai objektif sosioekonomi negara dan bagi perkara-perkara yang berkaitan dengannya".

Pindaan am**3. Akta ibu dipinda—**

- (a) dalam teks bahasa kebangsaan, dengan menggantikan perkataan "koperasi berdaftar" di mana-mana jua terdapat dengan perkataan "koperasi";
- (b) dalam teks bahasa Inggeris, dengan menggantikan perkataan "registered society" dan "society" di mana-mana jua terdapat masing-masing dengan perkataan "co-operative society";
- (c) dalam teks bahasa Inggeris, dengan menggantikan perkataan "registered societies" dan "societies" di mana-mana jua terdapat masing-masing dengan perkataan "co-operative societies"; dan
- (d) dengan menggantikan perkataan "Ketua Pendaftar" di mana-mana jua terdapat dengan perkataan "Suruhanjaya".

Pindaan seksyen 2**4. Seksyen 2 Akta ibu dipinda—**

- (a) dengan menggantikan takrif "anggota" dengan takrif yang berikut:
 - ' "anggota" termasuklah seseorang atau sesuatu koperasi yang turut sama dalam permohonan pendaftaran sesuatu koperasi dan yang telah menandatangani minit mesyuarat agung permulaan koperasi itu dan seseorang atau sesuatu koperasi yang diterima menjadi anggota koperasi mengikut peraturan-peraturan dan undang-undang kecilnya selepas pendaftaran;'
- (b) dengan memasukkan selepas takrif "anggota" takrif yang berikut:
 - ' "cawangan" termasuklah pejabat berdaftar koperasi, suatu pejabat, suatu agensi, suatu pangkalan elektronik dan termasuklah suatu tempat yang diadakan dan disenggarakan bagi apa-apa tempoh masa untuk menjalankan urusan koperasi;'

(c) dengan menggantikan takrif "deposit" dengan takrif yang berikut:

' "deposit" ertinya suatu jumlah wang yang —

- (a) diterima atau dibayar atas terma yang kena dibayar balik, dengan atau tanpa pulangan atau faedah atau dengan suatu premium atau diskaun; atau
- (b) diterima atau dibayar atas terma yang kena dibayar balik, sama ada keseluruhannya atau sebahagiannya, dengan apa-apa balasan berupa wang atau nilai wang,

dan pembayaran balik itu adalah sama ada atas permintaan atau pada suatu masa atau mengikut hal keadaan yang dipersetujui oleh atau bagi pihak orang yang membuat pembayaran itu dan orang yang menerimanya, tidak kira sama ada transaksi itu diperihalkan sebagai suatu pinjaman, pendahuluan, pelaburan, simpanan, jualan atau jualan dan belian semula, tetapi tidak termasuk wang yang dibayar secara *bona fide* —

- (i) dengan cara suatu pendahuluan atau suatu pembayaran sebahagian di bawah suatu kontrak bagi jualan, sewaan atau peruntukan lain harta atau perkhidmatan, dan kena dibayar balik hanya dalam keadaan bahawa harta atau perkhidmatan itu tidak sebenarnya dijual, disewa atau selainnya diperuntukkan;
- (ii) dengan cara jaminan bagi pelaksanaan suatu kontrak atau dengan cara jaminan berkenaan dengan apa-apa kerugian yang mungkin berbangkit daripada ketidaklaksanaan sesuatu kontrak; dan
- (iii) tanpa menjejaskan subperenggan (ii), dengan cara jaminan bagi penyerahan atau pemulangan apa-apa harta, sama ada dalam suatu keadaan baik yang tertentu atau selainnya,

dan hendaklah termasuk wang yang didepositkan oleh mana-mana orang dengan sesuatu koperasi dalam suatu akaun deposit tetap atau akaun simpanan atau akaun deposit lain tetapi tidak termasuk suatu syer, yuran atau simpanan khusus;'

(d) dengan memasukkan selepas takrif "deposit" takrif yang berikut:

' "ditentukan", jika tiada cara disebutkan, ertinya ditentukan dari semasa ke semasa secara bertulis, dan suatu kuasa untuk menentukan termasuklah kuasa untuk menentukan secara berlainan bagi orang, kelas, kategori atau perihalan orang yang berlainan;;

(e) dengan memasukkan selepas takrif "ditentukan" takrif yang berikut:

' "ditetapkan", jika tiada cara disebutkan, ertinya ditetapkan dari semasa ke semasa melalui perintah yang disiarkan dalam *Warta*, dan suatu kuasa untuk menetapkan termasuklah kuasa untuk menetapkan secara berlainan bagi orang, kelas, kategori atau perihalan orang yang berlainan;;

(f) dengan memasukkan selepas takrif "dividen" takrif yang berikut:

' "dokumen" mempunyai erti yang sama seperti yang ditakrifkan dalam Akta Keterangan 1950 [*Akta 56*]-;;

(g) dengan memasukkan selepas takrif "dokumen" takrif yang berikut:

' "harta" ertinya apa-apa harta alih atau tak alih dan termasuklah—

(a) apa-apa hak, kepentingan, hakmilik, tuntutan, hak dalam tindakan, kuasa atau keistimewaan, sama ada pada masa ini atau hadapan, atau sama ada terletak hak atau kontingen, berhubung dengan apa-apa harta, atau selainnya yang mempunyai nilai;

(b) apa-apa dokumen pemindahhakan yang disempurnakan bagi memindahhakan, menyerahhakan, menetapkan, menyerahkan, atau selainnya memindahkan atau melupuskan harta yang orang yang menyempurnakan dokumen pemindahhakan itu ialah tuan punya atau memiliki atau yang dia berhak kepada suatu hak yang kontingen, sama ada bagi semua kepentingan atau bagi apa-apa kepentingan yang kurang;

- (c) apa-apa sekuriti, termasuk apa-apa saham, syer, debentur dan kumpulan wang;
- (d) apa-apa surat cara boleh niaga, termasuk apa-apa wang kertas bank, nota pembawa, bil perbendaharaan, waran dividen, bil pertukaran, nota janji hutang, cek dan sijil deposit boleh niaga;
- (e) apa-apa gadai janji atau gadaian, sama ada menurut undang-undang atau saksama, jaminan, lien atau sandaran, sama ada sebenar atau konstruktif, surat hipotekasi atau resit amanah, tanggung rugi, aku janji atau cara lain yang menjamin pembayaran atau pelepasan suatu hutang atau liabiliti, sama ada pada masa ini atau hadapan, atau sama ada terletak hak atau kontingen; dan
- (f) apa-apa harta ketara atau tidak ketara lain;';
- (h) dengan memasukkan selepas takrif "harta" takrif yang berikut:
 - ' "honorarium" ertinya suatu bahagian keuntungan bersih teraudit koperasi yang diagihkan antara beberapa atau semua anggota Lembaga sebagai balasan bagi perkhidmatan mereka yang lazimnya tidak diberi saraan;';
- (i) dengan memasukkan selepas takrif "honorarium" takrif yang berikut:
 - ' "kanak-kanak" mempunyai erti yang sama seperti yang ditakrifkan dalam Akta Kanak-Kanak 2001 [Akta 611]-;';
- (j) dengan memasukkan selepas takrif "kanak-kanak" takrif yang berikut:
 - ' "kemudahan kredit" mempunyai erti yang sama seperti yang ditakrifkan dalam Akta Suruhanjaya Koperasi Malaysia 2006 [Akta];';
- (k) dengan memasukkan selepas takrif "kesalahan boleh daftar" takrif yang berikut:
 - ' "ketua pegawai eksekutif", berhubung dengan suatu koperasi, ertinya seseorang dengan apa jua nama

dipanggil yang, sama ada secara individu atau berse sama dengan seorang lain atau lebih bertanggungjawab, tertakluk kepada kuasa Lembaga, bagi perjalanan urusan dan aktiviti koperasi;';

- (I) dengan memotong takrif "Ketua Pendaftar";
- (m) dengan memasukkan selepas takrif "ketua pegawai eksekutif" takrif yang berikut:
- ' "koperasi" ertinya suatu pertubuhan orang berautonomi yang bersatu secara sukarela untuk memenuhi keperluan dan aspirasi ekonomi, sosial dan budaya mereka yang sama melalui suatu perusahaan milik bersama dan dikawal secara demokrasi yang berdaftar di bawah Akta ini;';
- (n) dalam takrif "koperasi asas", dengan menggantikan perkataan "yang didaftarkan" dengan perkataan "sebagaimana yang diperuntukkan";
- (o) dalam takrif "koperasi atasan", dengan menggantikan perkataan "yang didaftarkan" dengan perkataan "sebagaimana yang diperuntukkan";
- (p) dengan memotong takrif "koperasi berdaftar";
- (q) dengan memasukkan selepas takrif "koperasi atasan" takrif yang berikut:
- ' "koperasi ditetapkan" ertinya suatu koperasi yang ditetapkan oleh Suruhanjaya melalui perintah secara bertulis mengikut kelas, kategori, jenis, aktiviti dan perihalan koperasi itu;';
- (r) dalam takrif "koperasi menengah", dengan menggantikan perkataan "yang didaftarkan" dengan perkataan "sebagaimana yang diperuntukkan";
- (s) dengan memasukkan selepas takrif "koperasi menengah" takrif yang berikut:
- ' "Kumpulan Wang Rizab Statutori" ertinya suatu kumpulan wang yang disenggara oleh tiap-tiap koperasi

menurut subseksyen 57(1) daripada keuntungan bersih teraudit setiap tahun;';

(t) dengan memasukkan selepas takrif "Lembaga" takrif yang berikut:

' "Menteri" ertinya Menteri yang dipertanggungjawabkan dengan tanggungjawab bagi pembangunan koperasi;';

(u) dengan menggantikan takrif "pegawai" dengan takrif yang berikut:

' "pegawai" berhubung dengan suatu koperasi, ertinya seorang pengerusi, setiausaha, bendahari atau mana-mana anggota lain Lembaga dan termasuklah —

(a) ketua pegawai eksekutif;

(b) mana-mana orang yang diberi kuasa oleh Lembaga, peraturan-peraturan atau perintah atau undang-undang kecil untuk memberi arahan berkenaan dengan urusan koperasi itu; atau

(c) mana-mana pekerja;';

(v) dengan memasukkan selepas takrif "pegawai" takrif yang berikut:

' "pembiayaan Islam" mempunyai erti yang sama seperti yang ditakrifkan dalam Akta Suruhanjaya Koperasi Malaysia 2006;';

(w) dengan memasukkan selepas takrif "pembiayaan Islam" takrif yang berikut:

' "Pengerusi Eksekutif ertinya Pengerusi Eksekutif Suruhanjaya;';

(x) dengan memasukkan selepas takrif "peraturan" takrif yang berikut:

' "perbadanan" mempunyai erti yang sama seperti yang ditakrifkan dalam Akta Syarikat 1965 [*Akta 125*]-;';

(y) dengan memasukkan selepas takrif "perbadanan" takrif yang berikut:

"perbadanan berkaitan" ertinya suatu subsidiari atau perbadanan bersekutu sesuatu koperasi atau sesuatu perbadanan bersekutu suatu subsidiari sesuatu koperasi;'

(z) dengan memasukkan selepas takrif "perbadanan berkaitan" takrif yang berikut:

' "perbadanan bersekutu" ertinya suatu perbadanan yang tidak kurang daripada dua puluh peratus dan tidak lebih daripada lima puluh peratus daripada syer perbadanan itu dipegang oleh suatu perbadanan lain, dengan perbadanan yang mula-mula disebut menjadi suatu perbadanan sekutu bagi perbadanan yang lain itu;'

(aa) dalam takrif "pelantikan", dengan memotong perkataan "melalui pemilihan";

(bb) dengan memotong takrif "perniagaan pembiayaan";

(cc) dengan menggantikan takrif "prinsip koperasi" dengan takrif yang berikut:

' "prinsip koperasi" termasuklah—

(a) keanggotaan sukarela dan terbuka;

(b) kawalan demokratik oleh anggota;

(c) penglibatan ekonomi oleh anggota;

(d) autonomi dan kebebasan;

(e) pendidikan, latihan dan maklumat;

(f) kerjasama antara koperasi; dan

(g) mengambil berat terhadap masyarakat;'

(dd) dengan memasukkan selepas takrif "prinsip koperasi" takrif yang berikut:

' "pulangan" termasuklah apa-apa bentuk sewaan, pulangan, dividen atau faedah, termasuk apa-apa fi

Koperasi (Pindaan)

9

atau hadiah, yang kena dibayar atau akan diberikan berhubung dengan apa-apa urusan niaga, transaksi atau surat cara;';

(ee) dengan memasukkan selepas takrif "sabitan" takrif yang berikut:

' "sekuriti" mempunyai erti yang sama seperti yang ditakrifkan dalam Akta Suruhanjaya Sekuriti 1993 [*Akta 498*]-;';

(ff) dengan memasukkan selepas takrif "subsidiari" takrif yang berikut:

' "Suruhanjaya" ertinya Suruhanjaya Koperasi Malaysia yang ditubuhkan di bawah Akta Suruhanjaya Koperasi Malaysia 2006;';

(gg) dengan memasukkan selepas takrif "syer" takrif yang berikut:

' "tahun kewangan" ertinya tempoh kewangan perniagaan bagi setiap koperasi sebagaimana yang diperuntukkan dalam undang-undang kecilnya;';

(hh) dalam takrif "wang lebihan", dengan memasukkan selepas perkataan "ertinya" perkataan "tertakluk kepada peraturan-peraturan,"; dan

(ii) dalam takrif "yuran", dengan menggantikan perkataan "yang boleh dikeluarkan apabila tamat keanggotaannya" dengan perkataan "tidak boleh dikeluarkan kecuali menurut syarat yang ditetapkan dalam undang-undang kecil atau apabila tamat keanggotaannya".

Pemotongan seksyen 3

5. Akta ibu dipinda dengan memotong seksyen 3.

Pindaan seksyen 5

6. Perenggan 5(1)(a) Akta ibu dipinda dengan menggantikan perkataan "satu ratus" dengan perkataan "lima puluh".

Pindaan seksyen 6**7. Subseksyen 6(2) Akta ibu dipinda—**

- (a) dalam perenggan (a), dengan memotong perkataan "dan" di hujung perenggan itu;
- (b) dengan menggantikan perenggan (b) dengan perenggan yang berikut:

"(b) dalam hal suatu koperasi asas, tertakluk kepada subseksyen 8(2), minit mesyuarat agung permulaan yang ditandatangani oleh sekurang-kurangnya dua puluh lima orang yang hadir; atau"; dan

- (c) dengan memasukkan selepas perenggan (b) perenggan yang berikut:

"(c) dalam hal suatu koperasi menengah atau koperasi atasan, minit mesyuarat agung permulaan yang ditandatangani oleh semua orang yang diberi kuasa sewajarnya yang hadir."

Pindaan seksyen 10**8. Seksyen 10 Akta ibu dipinda dengan menggantikan perkataan "ditandatangani" dengan perkataan "dikeluarkan".****Seksyen baru 10A dan 10B****9. Akta ibu dipinda dengan memasukkan selepas seksyen 10 seksyen yang berikut:****"Pengemukaan diri sebagai koperasi**

10A. (1) Tiada seorang pun boleh mengemukakan dirinya sebagai suatu koperasi, atau menyatakan bahawa dia atau mana-mana orang lain menjalankan urusan suatu koperasi mengikut apa-apa bentuk atau cara melainkan jika dia atau orang lain itu, mengikut mana-mana yang berkenaan, berdaftar di bawah Akta ini.

(2) Mana-mana orang yang melanggar subseksyen (1) melakukan suatu kesalahan dan boleh, apabila disabitkan, didenda tidak melebihi lima juta ringgit atau dipenjarakan selama tempoh tidak melebihi lima tahun atau kedua-duanya.

Larangan penggunaan perkataan "koperasi", dll.

10B. (1) Tiada seorang pun selain suatu koperasi boleh berdagang atau menjalankan apa-apa urusan atau urus niaga di bawah apa-apa nama atau gelaran yang perkataan "koperasi", "koperatif", "ko-operatif", atau "ko-op", atau apa-apa terbitan daripada perkataan ini dalam apa-apa bahasa, atau apa-apa perkataan lain dalam apa-apa bahasa yang boleh ditafsirkan sebagai menunjukkan penjalanan urusan atau urus niaga sedemikian, berhubung dengan urusan atau urus niaga atau apa-apa bahagian urusan atau urus niaga yang dijalankan oleh orang itu, atau membuat apa-apa representasi yang bermaksud sedemikian dalam apa-apa kepala bil, kertas surat, notis, iklan atau mengikut apa-apa cara lain jua pun.

(2) Mana-mana orang yang melanggar subseksyen (1) melakukan suatu kesalahan dan boleh, apabila disabitkan, didenda tidak melebihi lima juta ringgit atau dipenjarakan selama tempoh tidak melebihi lima tahun atau kedua-duanya dan boleh sebagai tambahan, didenda harian lima ribu ringgit bagi setiap hari kesalahan itu berterusan selepas sabitan."

Penggantian seksyen 12

10. Akta ibu dipinda dengan menggantikan seksyen 12 dengan seksyen yang berikut:

"Nama berdaftar hendaklah dipamerkan

12. Tiap-tiap koperasi berdaftar hendaklah mempamerkan dengan ketara pada setiap cawangannya—

- (a) nama berdaftar koperasi itu; atau
- (b) dengan kelulusan bertulis terlebih dahulu Suruhanjaya, apa-apa nama atau logo lain sebagaimana yang boleh melambangkan koperasi itu."

Pindaan seksyen 13

11. Seksyen 13 Akta ibu dipinda—

- (a) dengan menomborkan semula seksyen yang sedia ada sebagai subseksyen (1) seksyen itu;

- (b) dalam perenggan (l)(a), dengan memasukkan selepas perkataan "peraturan-peraturan" perkataan "atau perintah, arahan atau garis panduan";
- (c) dalam perenggan (\)(b), dengan memotong perkataan "dan" di hujung perenggan itu;
- (d) dalam perenggan (l)fcj, dengan menggantikan koma yang terdapat selepas perkataan "anggotanya" dengan koma bernoktah;
- (e) dengan memasukkan selepas perenggan (\)(c) perenggan yang berikut:
 - "(d) suatu senarai anggota Lembaga;
 - (e) nama ketua pegawai eksekutifnya, jika ada; dan
 - (f) suatu senarai pegawai koperasi yang berkenaan dengan pengurusan koperasi itu, jika ada,"; dan
- (f) dengan memasukkan selepas subseksyen (1) subseksyen yang berikut:
 - "(2) Mana-mana koperasi atau pegawai koperasi yang tidak mematuhi subseksyen (1) melakukan suatu kesalahan dan boleh, apabila disabitkan —
 - (a) dalam hal suatu koperasi, didenda tidak melebihi dua ratus ribu ringgit dan boleh sebagai tambahan, didenda harian satu ratus ringgit bagi setiap hari kesalahan itu berterusan selepas sabitan; atau
 - (b) dalam hal seorang pegawai koperasi, didenda tidak melebihi dua ratus ribu ringgit atau dipenjarakan selama tempoh tidak melebihi satu tahun atau kedua-duanya dan boleh, sebagai tambahan, didenda harian satu ratus ringgit bagi setiap hari kesalahan itu berterusan selepas sabitan."

Pindaan seksyen 14

12. Seksyen 14 Akta ibu dipinda—

- (a) dengan menomborkan semula seksyen yang sedia ada sebagai subseksyen (1) seksyen itu;
- (b) dalam perenggan (l)(b), dengan memotong perkataan "dan mesyuarat Lembaga";

- (c) dalam perenggan (l)(c), dengan memasukkan selepas perkataan "keadaan kewangan koperasi itu" perkataan ", termasuk minit mesyuarat Lembaga"; dan
- (d) dengan memasukkan selepas subseksyen (1) subseksyen yang berikut:
 - "(2) Mana-mana koperasi atau pegawai koperasi yang tidak mematuhi subseksyen (1) melakukan suatu kesalahan dan boleh, apabila disabitkan —
 - (a) dalam hal suatu koperasi, didenda tidak melebihi dua ratus ribu ringgit dan boleh sebagai tambahan, didenda harian satu ratus ringgit bagi setiap hari kesalahan itu berterusan selepas sabitan; atau
 - (b) dalam hal seorang pegawai koperasi, didenda tidak melebihi dua ratus ribu ringgit atau dipenjarakan selama tempoh tidak melebihi satu tahun atau kedua-duanya dan boleh, sebagai tambahan, didenda harian satu ratus ringgit bagi setiap hari kesalahan itu berterusan selepas sabitan."

Pindaan seksyen 17

- 13. Seksyen 17 Akta ibu dipinda—
 - (a) dengan menomborkan semula seksyen yang sedia ada sebagai subseksyen (1) seksyen itu; dan
 - (b) dengan memasukkan selepas subseksyen (1) subseksyen yang berikut:
 - "(2) Suruhanjaya boleh, pada bila-bila masa, menghendaki undang-undang kecil suatu koperasi untuk mengandungi peruntukan yang berhubungan dengan kerahsiaan atau pendedahan yang dibenarkan dan undang-undang kecil itu hendaklah, tertakluk kepada subseksyen (1), mengikat koperasi itu dan anggota-anggotanya."

Seksyen baru 17A

- 14. Akta ibu dipinda dengan memasukkan selepas seksyen 17 seksyen yang berikut:

"Pemakaian undang-undang kecil

17A. (1) Mana-mana undang-undang kecil sesuatu koperasi yang tidak selaras dengan peruntukan Akta ini hendaklah terbatal setakat ketidakselarasan itu.

(2) Tertakluk kepada mana-mana peraturan atau perintah atau arahan atau garis panduan, tiap-tiap koperasi hendaklah mengkaji semula undang-undang kecilnya dan membuat pindaan yang perlu dalam masa dua tahun dari tarikh permulaan kuat kuasa Akta ini, atau apa-apa tempoh lanjutan sebagaimana yang diluluskan oleh Suruhanjaya, untuk memastikan undang-undang kecilnya selaras dengan Akta ini.

(3) Jika koperasi itu, selepas kajian semula atau pindaan yang dibuat di bawah subseksyen (2), berpendapat bahawa undang-undang kecilnya adalah selaras atau sebaliknya, Lembaga koperasi hendaklah memberitahu hakikat itu kepada Suruhanjaya.

(4) Mana-mana koperasi atau pegawai koperasi yang tidak mematuhi subseksyen (2) melakukan suatu kesalahan dan boleh, apabila disabitkan —

(a) dalam hal suatu koperasi, didenda tidak melebihi dua ratus ribu ringgit dan boleh, sebagai tambahan, didenda harian satu ratus ringgit bagi setiap hari kesalahan itu berterusan selepas sabitan; atau

(b) dalam hal seorang pegawai koperasi, didenda tidak melebihi dua ratus ribu ringgit atau dipenjarakan selama tempoh tidak melebihi enam bulan atau kedua-duanya dan boleh, sebagai tambahan, didenda harian satu ratus ringgit bagi setiap hari kesalahan itu berterusan selepas sabitan."

Pindaan seksyen 18

15. Seksyen 18 Akta ibu dipinda—

(a) dalam subseksyen (3), dengan menggantikan perkataan "dia" dengan perkataan "Suruhanjaya";

(b) dengan menggantikan subseksyen (4) dengan subseksyen yang berikut:

" (4) Sesuatu rayuan terhadap keengganan Suruhanjaya untuk mendaftarkan apa-apa pindaan mana-mana undang-undang kecil boleh dibuat kepada Menteri dan

- rayuan itu hendaklah dibuat dalam masa tiga bulan dari tarikh keengganan itu."; dan
- (c) dalam subseksyen (6)
- (i) dalam teks bahasa kebangsaan, dengan menggantikan perkataan "dia" dan "olehnya" masing-masing dengan perkataan "Suruhanjaya" dan "oleh Suruhanjaya"; dan
 - (ii) dalam teks bahasa Inggeris, dengan menggantikan perkataan "he" dan "him" masing-masing dengan perkataan "the Commission".

Pindaan seksyen 18A

16. Seksyen 18A Akta ibu dipinda—

- (a) dalam subseksyen (1) —
- (i) dalam teks bahasa kebangsaan, dengan menggantikan perkataan "olehnya" dengan perkataan "oleh Suruhanjaya"; dan
 - (ii) dalam teks bahasa Inggeris, dengan menggantikan perkataan "him" di mana-mana jua terdapat dengan perkataan "the Commission";
- (b) dalam perenggan (1)(a), dengan memotong perkataan "atau" di hujung perenggan itu;
- (c) dalam perenggan (1)(b), dengan menggantikan noktah di hujung perenggan itu dengan perkataan "; atau";
- (d) dengan memasukkan selepas perenggan (b) perenggan yang berikut:
- "(c) apabila pemberitahuan dibuat oleh Lembaga sesuatu koperasi di bawah subseksyen 17A(3), bahawa undang-undang kecil sesuatu koperasi adalah tidak selaras dengan Akta ini."; dan
- (e) dalam subseksyen (2) teks bahasa Inggeris, dengan menggantikan perkataan "his" dengan perkataan "its".

Pindaan seksyen 19

17. Akta ibu dipinda dengan menggantikan seksyen 19 dengan seksyen yang berikut:

"19. (1) Tiada koperasi boleh membentuk, mempunyai, memperoleh atau menubuhkan sesuatu subsidiari kecuali dengan kelulusan bertulis terlebih dahulu Suruhanjaya.

(2) Tiada koperasi boleh memberikan apa-apa pembiayaan Islam atau kemudahan kredit atau memberi apa-apa jaminan atau aku janji bagi pembiayaan atau kemudahan itu atau memindahkan apa-apa wang atau aset dalam apa-apa bentuk kepada subsidiarinya kecuali dengan kelulusan bertulis terlebih dahulu Suruhanjaya.

(3) Suruhanjaya boleh, melalui suatu notis secara bertulis, menghendaki mana-mana subsidiari sesuatu koperasi untuk mematuhi apa-apa kehendak yang dikenakan oleh Akta ini, peraturan-peraturan atau perintah atau arahan atau garis panduan.

(4) Mana-mana koperasi atau pegawai koperasi yang tidak mematuhi subseksyen (1) atau (2) melakukan suatu kesalahan dan boleh, apabila disabitkan —

(a) dalam hal suatu koperasi, didenda tidak melebihi lima ratus ribu ringgit dan boleh sebagai tambahan, didenda harian satu ratus ringgit bagi setiap hari kesalahan itu berterusan selepas sabitan; atau

(b) dalam hal seorang pegawai koperasi, didenda tidak melebihi lima ratus ribu ringgit atau dipenjarakan selama tempoh tidak melebihi satu tahun atau kedua-duanya dan boleh, sebagai tambahan, didenda harian satu ratus ringgit bagi setiap hari kesalahan itu berterusan selepas sabitan."

Seksyen baru 19A

18. Akta ibu dipinda dengan memasukkan selepas seksyen 19 seksyen berikut:

"Cawangan koperasi atau subsidiari

19A. (1) Tiada koperasi atau subsidiari sesuatu koperasi boleh membuka apa-apa cawangan di dalam atau di luar

Malaysia tanpa kelulusan bertulis terlebih dahulu Suruhanjaya.

(2) Mana-mana koperasi atau pegawai koperasi yang tidak mematuhi subseksyen (1) melakukan suatu kesalahan dan boleh, apabila disabitkan, didenda tidak melebihi dua ratus ribu ringgit."

Pemotongan seksyen 20

19. Akta ibu dipinda dengan memotong seksyen 20.

Pindaan seksyen 22

20. Seksyen 22 Akta ibu dipinda—

- (a) dalam nota bahu, dengan memasukkan selepas perkataan "syer" perkataan ", pulangan"; dan
- (b) dengan menggantikan perkataan "atau yuran" dengan perkataan ", yuran, pulangan".

Pindaan seksyen 23

21. Seksyen 23 Akta ibu dipinda—

- (a) dalam nota bahu, dengan memasukkan selepas perkataan ", yuran" perkataan ", pulangan"; dan
- (b) dengan menggantikan perkataan "atau yuran" dengan perkataan ", yuran, pulangan".

Pindaan seksyen 24

22. Seksyen 24 Akta ibu dipinda—

- (a) dalam nota bahu, dengan memasukkan selepas perkataan "harta dan" perkataan ", pulangan atau";
- (b) dengan memasukkan selepas perkataan "syer" di mana-mana jua terdapat perkataan ", pulangan"; dan

- (c) dengan memasukkan selepas perkataan "atau faedah" di mana-mana jua terdapat perkataan ", mengikut mana-mana yang berkenaan,".

Pindaan seksyen 25**23.** Seksyen 25 Akta ibu dipinda—

- (a) dalam nota bahu, dengan menggantikan perkataan "orang belum dewasa" dengan perkataan "kanak-kanak";
- (b) dalam teks bahasa kebangsaan, dengan menggantikan perkataan "orang belum dewasa" di mana-mana jua terdapat dengan perkataan "kanak-kanak"; dan
- (c) dalam teks bahasa Inggeris —
 - (i) dalam subseksyen (1), dengan menggantikan perkataan "minors" dengan perkataan "children"; dan
 - (ii) dengan menggantikan perkataan "minor" di mana-mana jua terdapat dengan perkataan "child".

Pemotongan seksyen 29**24.** Akta ibu dipinda dengan memotong seksyen 29.**Pindaan seksyen 31****25.** Seksyen 31 Akta ibu dipinda dalam nota bahu, dengan menggantikan perkataan "Perwakilan" dengan perkataan "Pengundian".**Penggantian seksyen 32****26.** Akta ibu dipinda dengan menggantikan seksyen 32 dengan seksyen yang berikut:**"Kontrak anggota kanak-kanak dengan koperasi**

32. Walau apa pun perenggan 26(b), seorang kanak-kanak yang diterima sewajarnya sebagai anggota mana-mana koperasi boleh menyempurnakan apa-apa surat cara atau memberi apa-apa penjelasan yang perlu disempurnakan atau diberikan

di bawah Akta ini atau peraturan-peraturan, dan statusnya sebagai seorang kanak-kanak tidaklah menjadi suatu alasan bagi menidaksahkan atau mengelakkan apa-apa kontrak yang dibuat olehnya dengan koperasi itu, sama ada sebagai prinsipal atau sebagai penjamin, dan boleh dikuatkuasakan di sisi undang-undang."

Seksyen bam 34A

27. Akta ibu dipinda dengan memasukkan selepas seksyen 34 seksyen yang berikut:

"Liabiliti anggota terhad oleh yuran atau syer

34A. (1) Tertakluk kepada subseksyen (2), liabiliti seseorang anggota, anggota sekarang atau bekas anggota, sesuatu koperasi hendaklah setakat nilai nominal apa-apa syer yang dipegang, atau dilanggani, olehnya.

(2) Jika dalam undang-undang kecil sesuatu koperasi amaun liabiliti seseorang anggota dinyatakan lebih besar daripada nilai nominal apa-apa syer yang dipegang atau dilanggani olehnya, maka liabiliti anggota itu hendaklah setakat amaun yang lebih besar itu."

Pindaan seksyen 35

28. Subseksyen 35(1) Akta ibu dipinda, dengan memasukkan selepas perkataan "hutang koperasi itu" perkataan ", dalam pengehadan yang diperuntukkan dalam seksyen 34A,".

Pindaan seksyen 36

29. Seksyen 36 Akta ibu dipinda dengan memasukkan selepas perkataan "peraturan-peraturan" perkataan "atau arahan atau garis panduan".

Pindaan seksyen 37

30. Seksyen 37 Akta ibu dipinda dengan menggantikan perkataan "Tiap-tiap koperasi" dengan perkataan "Melainkan jika Suruhanjaya menentukan selainnya, tiap-tiap koperasi".

Pindaan seksyen 38

31. Akta ibu dipinda dengan menggantikan seksyen 38 dengan seksyen yang berikut:

"Mesyuarat agung permuiaan

38. (1) Mesyuarat agung permuiaan sesuatu koperasi yang dicadangkan hendaklah diadakan oleh anggota yang dicadangkannya untuk—

- (a) bersetuju tentang pengemukakan permohonan koperasi untuk didaftarkan;
- (b) menerima pakai undang-undang kecil yang dicadangkan;
- (c) memilih anggota Lembaga; dan
- (d) menjalankan apa-apa perkara lain sebagaimana yang dikehendaki oleh undang-undang kecilnya atau Suruhanjaya.

(2) Mesyuarat agung permuiaan yang diperuntukkan dalam subseksyen (1) hendaklah mempunyai segala kuasa yang seumpama sebagaimana dalam mesyuarat agung tahunan di bawah seksyen 39 dan anggota itu hendaklah mempunyai hak yang sama pada mesyuarat agung permuiaan itu sebagaimana yang diperuntukkan di bawah peraturan-peraturan dan undang-undang kecil."

Pindaan seksyen 39

32. Seksyen 39 Akta ibu dipinda—

- (a) dengan menomborkan semula seksyen yang sedia ada sebagai subseksyen (1) seksyen itu;
- (b) dalam subseksyen (1), dengan memasukkan selepas perkataan "selepas berakhirnya setiap tahun kewangan" perkataan "atau tempoh yang lebih panjang sebagaimana yang diluluskan oleh Suruhanjaya"; dan

(c) dengan memasukkan selepas subseksyen (1) subseksyen yang berikut:

"(2) Mana-mana koperasi atau pegawai koperasi yang tidak mematuhi subseksyen (1) melakukan suatu kesalahan dan boleh, apabila disabitkan, didenda tidak melebihi dua ratus ribu ringgit."

Pindaan seksyen 40

33. Seksyen 40 Akta ibu dipinda dalam subseksyen (2) —

(a) dalam teks bahasa kebangsaan, dengan menggantikan perkataan "diarahkannya" dengan perkataan "diarahkan oleh Suruhanjaya"; dan

(b) dalam teks bahasa Inggeris, dengan menggantikan perkataan "he" dengan perkataan "the Commission".

Penggantian seksyen 42

34. Akta ibu dipinda dengan menggantikan seksyen 42 dengan seksyen yang berikut:

"Lembaga koperasi

42. Tertakluk kepada peraturan-peraturan atau perintah atau arahan atau garis panduan, tiap-tiap koperasi hendaklah mempunyai suatu Lembaga, yang hendaklah terdiri daripada tidak kurang daripada enam orang dan tidak lebih daripada lima belas orang anggota yang dilantik dengan sewajarnya pada mesyuarat agung tahunan."

Seksyen baru 42A

35. Akta ibu dipinda dengan memasukkan selepas seksyen 42 seksyen yang berikut:

"Jawatankuasa Audit Dalaman

42A. (1) Lembaga hendaklah menubuhkan suatu Jawatankuasa Audit Dalaman yang terdiri daripada tidak kurang daripada tiga orang dan tidak lebih daripada lima orang anggota yang dilantik dengan sewajarnya oleh Lembaga.

(2) Tugas dan tanggungjawab Jawatankuasa itu hendaklah diperuntukkan dalam undang-undang kecil.

(3) Bagi maksud seksyen ini, perkataan "pegawai" sebagaimana yang ditakrifkan dalam seksyen 2 tidaklah termasuk anggota Jawatankuasa Audit Dalaman."

Pindaan seksyen 43

36. Akta ibu dipinda dengan menggantikan seksyen 43 dengan seksyen yang berikut:

"Kelayakan bagi dilantik menjadi anggota Lembaga

43. (1) Tiada seorang pun layak dilantik menjadi anggota Lembaga atau kekal sebagai seorang anggota Lembaga sesuatu koperasi jika dia telah —

(a) disabitkan atas suatu kesalahan di bawah Akta ini;
atau

(b) dipecat sebagai seorang pegawai sesuatu koperasi.

(2) Walau apa pun subseksyen (1) dan tertakluk kepada apa-apa arahan atau garis panduan sebagaimana yang ditentukan oleh Suruhanjaya, sesuatu koperasi hendaklah, sebelum pelantikan atau pelantikan semula mana-mana orang sebagai anggota Lembaga, meminta penentusahan daripada Suruhanjaya sama ada orang itu memenuhi kriteria layak dan sesuai sebagaimana yang ditentukan oleh Suruhanjaya.

(3) Setelah penentusahan bahawa orang itu telah memenuhi kriteria layak dan sesuai di bawah subseksyen (2), koperasi boleh melantik atau melantik semula orang itu sebagai anggota Lembaganya.

(4) Dari tahun ketiga pendaftaran sesuatu koperasi, tiada seorang pun boleh dilantik sebagai anggota Lembaga koperasi itu melainkan jika dia telah menjadi anggota koperasi itu bagi tempoh minimum dua tahun.

(5) Subseksyen (4) tidak terpakai bagi sesuatu koperasi yang anggotanya berjumlah lima puluh orang atau kurang dan bagi sesuatu koperasi sekolah."

Pindaan seksyen 44

37. Akta ibu dipinda dengan menggantikan seksyen 44 dengan seksyen yang berikut:

"44. (1) Lembaga sesuatu koperasi hendaklah mewakili koperasi itu di hadapan semua pihak berkuasa awam yang berwajib dan dalam semua urusan niaga dan transaksi dengan orang ketiga, hendaklah mempunyai kuasa untuk memulakan atau membela guaman yang dibawa atas nama koperasi itu dan, pada umumnya, hendaklah mengarahkan, menguruskan dan mengawasi urusan atau aktiviti, kumpulan wang dan harta koperasi itu, dan hendaklah menjalankan segala kuasa yang perlu untuk memastikan pentadbiran dan pengurusan yang sepenuhnya dan sepatutnya akan hal ehwal, urusan atau aktiviti koperasi itu termasuk, dan walau apa pun keluasan makna di atas, urusan atau aktiviti koperasi itu sebagaimana yang dikehendaki di bawah peraturan-peraturan, kecuali kuasa yang dikhasakan untuk mesyuarat agung anggota atau perwakilan.

(2) Mana-mana anggota Lembaga Koperasi yang tidak mematuhi subseksyen (1) melakukan suatu kesalahan dan boleh, apabila disabitkan, didenda tidak melebihi dua ratus ribu ringgit."

Seksyen baru 44A dan 44B

38. Akta ibu dipinda dengan memasukkan selepas seksyen 44 seksyen yang berikut:

"Pendedahan kepentingan dalam pembiayaan Islam atau kemudahan kredit oleh anggota Lembaga atau ketua pegawai eksekutif

44A. (1) Tiap-tiap anggota Lembaga atau ketua pegawai eksekutif, jika ada, sesuatu koperasi yang mempunyai, dalam apa-apa jua cara, sama ada secara langsung atau tidak langsung, apa-apa kepentingan dalam sesuatu pembiayaan Islam atau kemudahan kredit yang dicadangkan untuk diberikan kepada mana-mana orang oleh koperasi itu hendaklah secepat yang dapat dilaksanakan mengisytiharkan secara bertulis jenis kepentingannya, pada suatu mesyuarat anggota Lembaga yang dibentuk dengan sewajarnya, dan setiausaha koperasi

itu, jika ada, atau pegawai lain yang dilantik oleh koperasi bagi maksud itu, hendaklah menyebabkan suatu salinan perisytiharan itu untuk diedarkan dengan serta-merta kepada tiap-tiap anggota Lembaga tidak kira sama ada dia hadir atau tidak pada mesyuarat itu.

(2) Bagi maksud subseksyen (1), suatu notis am secara bertulis yang disampaikan pada setiap anggota Lembaga sesuatu koperasi yang disebut dalam subseksyen itu oleh seorang anggota Lembaga koperasi itu, yang menjelaskan bahawa dia mempunyai kepentingan dalam sesuatu pembiayaan Islam atau kemudahan kredit itu, yang selepas tarikh notis itu boleh diberikan kepada orang itu hendaklah disifatkan sebagai perisytiharan kepentingan yang memadai berhubung dengan sesuatu pembiayaan Islam atau kemudahan kredit yang diberikan itu jika—

- (a) ia menyatakan jenis dan takat kepentingan orang itu; atau
- (b) pada masa pembiayaan Islam atau kemudahan kredit itu diberikan, kepentingannya tidak berbeza pada jenisnya atau lebih besar daripada yang dinyatakan dalam notis itu.

(3) Mana-mana anggota lembaga atau ketua pegawai eksekutif sesuatu koperasi yang tidak mematuhi subseksyen (1) melakukan suatu kesalahan dan boleh, apabila disabitkan, didenda tidak melebihi lima ratus ribu ringgit atau dipenjarakan selama tempoh tidak melebihi enam bulan atau kedua-duanya.

Pendedahan percanggahan kepentingan oleh anggota Lembaga dan ketua pegawai eksekutif

44B. (1) Seseorang anggota Lembaga atau ketua pegawai eksekutif, jika ada, sesuatu koperasi yang memegang suatu jawatan atau memiliki sesuatu harta yang, sama ada secara langsung atau tidak langsung, suatu kewajipan atau suatu kepentingan mungkin wujud yang bercanggah dengan kewajipan atau kepentingannya sebagai seorang anggota Lembaga atau ketua pegawai eksekutif, hendaklah mengisytiharkan hakikat, jenis dan takat percanggahan yang mungkin berbangkit pada mesyuarat pertama Lembaga yang diadakan—

- (a) selepas dia menjadi seorang anggota Lembaga atau ketua pegawai eksekutif, sesuatu koperasi; atau

(b) jika dia telah pun menjadi seorang anggota Lembaga atau ketua pegawai eksekutif sesuatu koperasi, selepas dia mula memegang jawatan atau memiliki harta yang melaluinya percanggahan itu mungkin berbangkit.

(2) Mana-mana anggota Lembaga atau ketua pegawai eksekutif sesuatu koperasi yang tidak mematuhi subseksyen (1) melakukan suatu kesalahan dan boleh, apabila disabitkan, didenda tidak melebihi lima ratus ribu ringgit atau dipenjarakan selama tempoh tidak melebihi enam bulan atau kedua-duanya."

Pindaan seksyen 45

39. Seksyen 45 Akta ibu dipinda—

- (a) dalam subseksyen (1), dengan memasukkan selepas perkataan "peraturan-peraturan," perkataan "perintah atau";
- (b) dalam subseksyen (2), dengan memasukkan selepas perkataan "peraturan-peraturan" perkataan ", perintah";
- (c) dalam subseksyen (3), dengan menggantikan perkataan "pengurus" dengan perkataan "ketua pegawai eksekutif; dan
- (d) dengan memasukkan selepas subseksyen (3) subseksyen yang berikut:

"(4) Mana-mana anggota Lembaga sesuatu koperasi yang tidak mematuhi subseksyen (1) melakukan suatu kesalahan dan boleh, apabila disabitkan, didenda tidak melebihi dua ratus ribu ringgit."

Pindaan seksyen 46

40. Seksyen 46 Akta ibu dipinda—

- (a) dalam nota bahu, dengan memotong perkataan "dan Jawatankuasa Audit Dalam";
- (b) dalam subseksyen (1), dengan memotong perkataan "atau Jawatankuasa Audit Dalam"; dan
- (c) dalam subseksyen (3), dengan memotong perkataan "atau seseorang anggota Jawatankuasa Audit Dalam suatu koperasi".

Pemotongan seksyen 49

41. Akta ibu dipinda dengan memotong seksyen 49.

Pindaan seksyen 50

42. Seksyen 50 Akta ibu dipinda—

(a) dalam perenggan (c), dengan memotong perkataan "modal";

(b) dengan menggantikan perenggan (e) dengan perenggan yang berikut:

"(e) tertakluk kepada subseksyen 52(1) atau peraturan-peraturan, deposit atau pinjaman daripada anggota dan dengan kelulusan daripada Suruhanjaya, daripada orang yang bukan anggota koperasi itu;" dan

(c) dalam perenggan (g), dengan memasukkan selepas perkataan "kelulusan" perkataan "bertulis".

Penggantian seksyen 51

43. Akta ibu dipinda dengan menggantikan seksyen 51 dengan seksyen yang berikut:

"Pembiayaan Islam atau kemudahan kredit oleh koperasi

51. (1) Tiada koperasi boleh memberikan apa-apa pembiayaan Islam atau kemudahan kredit kecuali kepada anggotanya, pekerjaanya termasuk ketua pegawai eksekutif sebagaimana yang diperuntukkan dalam skim perkhidmatan mereka, subsidiarinya sebagaimana yang diperuntukkan di bawah subseksyen 19(2), atau koperasi yang lain sebagaimana yang diluluskan oleh Suruhanjaya, dan pembiayaan Islam atau kemudahan kredit itu hendaklah tertakluk kepada arahan atau garis panduan yang dikeluarkan oleh Suruhanjaya dan undang-undang kecil koperasi itu.

(2) Subseksyen (1) tidak terpakai bagi sesuatu koperasi yang dibenarkan untuk memberikan apa-apa pembiayaan Islam atau kemudahan kredit yang diberikan —

- (a) dalam perjalanan urusannya sebagaimana yang diperuntukkan dalam mana-mana undang-undang bertulis lain yang menentukan operasinya; atau
- (b) mengikut undang-undang kecilnya.

(3) Suruhanjaya boleh, melalui perintah, melarang atau menyekat pinjaman wang pada suatu gadaian atau gadai janji harta tak alih oleh mana-mana koperasi atau kelas, kategori atau perihalan sesuatu koperasi."

Penggantian seksyen 52

44. Akta ibu dipinda dengan menggantikan seksyen 52 dengan seksyen yang berikut:

"Sekatan atas pinjaman

52. (1) Sesuatu koperasi boleh menerima deposit dan meminjam wang daripada anggotanya.

(2) Tertakluk kepada seksyen 52A dan peraturan-peraturan, sesuatu koperasi boleh meminjam wang daripada orang yang bukan anggota koperasi itu.

(3) Sesuatu koperasi hendaklah memberitahu anggotanya mengenai pinjamannya di bawah subseksyen (1) pada mesyuarat agung tahunannya.

(4) Mana-mana koperasi yang tidak mematuhi seksyen ini melakukan suatu kesalahan dan boleh, apabila disabitkan, didenda tidak melebihi lima ratus ribu ringgit."

Seksyen baru 52A

45. Akta ibu dipinda dengan memasukkan selepas seksyen 52 seksyen yang berikut:

"Larangan mengenai deposit daripada bukan anggota

52A. (1) Sesuatu koperasi tidak boleh menerima deposit daripada orang yang bukan anggota koperasi itu kecuali sebagaimana yang diperuntukkan dalam peraturan-peraturan.

(2) Mana-mana koperasi yang melanggar subseksyen (1) melakukan suatu kesalahan dan boleh, apabila disabitkan, didenda tidak melebihi lima ratus ribu ringgit."

Pindaan seksyen 53

46. Seksyen 53 Akta ibu dipinda—

- (a) dengan menomborkan semula seksyen yang sedia ada sebagai subseksyen (1) seksyen itu;
- (b) dalam subseksyen (1), dengan menggantikan perkataan "ditetapkan" dengan perkataan "dinyatakan"; dan
- (c) dengan memasukkan selepas subseksyen (1) subseksyen yang berikut:

"(2) Mana-mana koperasi atau pegawai koperasi yang tidak mematuhi subseksyen (1) melakukan suatu kesalahan dan boleh, apabila disabitkan—

- (a) dalam hal suatu koperasi, didenda tidak melebihi dua ratus ribu ringgit; atau
- (b) dalam hal seorang pegawai koperasi, didenda tidak melebihi dua **ratus ribu ringgit** atau dipenjarakan selama tempoh tidak melebihi enam bulan atau kedua-duanya."

Pindaan seksyen 54

47. Akta ibu dipinda dengan menggantikan seksyen 54 dengan seksyen yang berikut:

"54. (1) Tertakluk kepada undang-undang kecilnya, sesuatu koperasi boleh melaburkan wang lebihannya dalam—

- (a) mana-mana sekuriti yang dikeluarkan oleh Kerajaan Malaysia, Bank Negara Malaysia atau mana-mana sekuriti lain yang diluluskan oleh Suruhanjaya; atau
- (b) syer mana-mana koperasi lain.

(2) Melainkan jika diperuntukkan selainnya dalam peraturan-peraturan, tiada koperasi boleh melabur wang lebihannya dalam—

- (a) bon atau debentur mana-mana koperasi lain;
- (b) sekuriti mana-mana syarikat atau mana-mana pertubuhan perbadanan yang didaftarkan di Malaysia, selain yang dinyatakan dalam subseksyen (1);
- (c) subsidiarinya; atau
- (d) apa-apa cara lain sebagaimana yang ditentukan oleh Suruhanjaya.

(3) Mana-mana koperasi atau pegawai koperasi yang tidak mematuhi subseksyen (2) melakukan suatu kesalahan dan boleh, apabila disabitkan—

- (a) dalam hal suatu koperasi, didenda tidak melebihi satu juta ringgit; atau
- (b) dalam hal seorang pegawai koperasi, didenda tidak melebihi satu juta ringgit atau dipenjarakan selama tempoh tidak melebihi satu tahun atau kedua-duanya."

Seksyen baru 54A

48. Akta ibu dipinda dengan memasukkan selepas seksyen 54 seksyen yang berikut:

"Pelaburan dalam harta tak alih

54A. (1) Melainkan jika diperuntukkan selainnya dalam peraturan-peraturan dan subseksyen (2), tiada koperasi boleh memperoleh, memegang atau melabur dalam apa-apa harta tak alih.

- (2) Subseksyen (1) tidak terpakai bagi sesuatu koperasi jika-
 - (a) pemegangan suatu harta tak alih itu adalah bagi pelunasan suatu hutang seseorang anggota koperasi;
 - (b) perniagaannya melibatkan pemerolehan, pelaburan dalam atau penjualan harta tak alih;

- (c) pemerolehan, pemegangan atau pelaburan suatu harta tak alih itu adalah perlu bagi maksud perjalanan perniagaannya; atau
- (d) koperasi itu memberi kemudahan perumahan atau kemudahan lain untuk pekerjaanya yang dinyatakan dalam skim perkhidmatan mereka.

(3) Mana-mana koperasi atau pegawai koperasi yang tidak mematuhi subseksyen (1) melakukan suatu kesalahan dan boleh, apabila disabitkan —

- (a) dalam hal suatu koperasi, didenda tidak melebihi satu juta ringgit; atau
- (b) dalam hal seorang pegawai koperasi, didenda tidak melebihi satu juta ringgit atau dipenjarakan selama tempoh tidak melebihi satu tahun atau kedua-duanya."

Pindaan seksyen 55

49. Seksyen 55 Akta ibu dipinda—

- (a) dalam subseksyen (3), dengan menggantikan perkataan "perenggan (1)fflj" dengan perkataan "subseksyen (1)"; dan
- (b) dalam subseksyen (4), dengan menggantikan perkataan "tetapi boleh" dengan perkataan "kecuali".

Pindaan seksyen 57

50. Seksyen 57 Akta ibu dipinda—

- (a) dengan menggantikan subseksyen (1) dengan subseksyen yang berikut:
 - "(1) Tiap-tiap koperasi hendaklah—
 - (a) menyenggara suatu Kumpulan Wang Rizab Statutori; dan
 - (b) sebelum mengisytiharkan apa-apa dividen daripada untung bersih terauditnya bagi setiap tahun, selepas peruntukan yang wajar telah

dibuat bagi pencukaian, memindahkan kepada Kumpulan Wang Rizab Statutorinya daripada untung bersih teraudit bagi setiap tahun—

- (i) suatu jumlah wang yang sama banyak dengan tidak kurang daripada dua puluh lima peratus daripada untung bersih teraudit bagi tahun itu, selagi amaun Kumpulan Wang Rizab Statutori itu kurang daripada lima puluh peratus daripada syer dan yurannya; atau
- (ii) suatu jumlah wang yang sama banyak dengan tidak kurang daripada lima belas peratus daripada untung bersih teraudit bagi tahun itu, selagi amaun Kumpulan Wang Rizab Statutori itu adalah lima puluh peratus tetapi kurang daripada seratus peratus daripada syer dan yurannya.";

(b) dengan memasukkan selepas subseksyen (1) subseksyen yang berikut:

" (IA) Walau apa pun subseksyen (1), Suruhanjaya boleh dari semasa ke semasa menentukan suatu bahagian berlainan daripada untung bersih teraudit bagi setiap tahun, iaitu sama ada kurang atau lebih daripada bahagian yang ditentukan dalam subseksyen (1), untuk dipindahkan kepada Kumpulan Wang Rizab Statutori sesuatu koperasi bagi maksud memastikan bahawa amaun Kumpulan Wang Rizab Statutori bagi koperasi itu adalah mencukupi bagi maksud perniagaannya dan memadai berhubung dengan liabiliti-liabilitinya.

(1B) Walau apa pun subseksyen (1), Kumpulan Wang Rizab Statutori boleh digunakan—

- (a) tertakluk kepada peraturan-peraturan atau undang-undang kecil, bagi membayar syer atau yuran yang dikeluarkan oleh anggota koperasi; atau
- (b) dengan kelulusan Suruhanjaya dan tertakluk kepada apa-apa terma dan syarat yang boleh dikenakan oleh Suruhanjaya, bagi menerbitkan syer bonus kepada anggota koperasi itu.

(lc) Tiada apa pun dalam seksyen ini boleh memberi sesuatu koperasi kuasa untuk membayar dividen daripada Kumpulan Wang Rizab Statutori.

(ID) Kumpulan Wang Rizab Statutori tidak boleh dibahagi dan tiada seorang pun anggota berhak untuk menuntut suatu bahagian tertentu daripadanya.

(1E) Kumpulan Wang Rizab Statutori hendaklah disenggara dalam suatu akaun yang berasingan dan hendaklah dilaburkan dalam Akaun Deposit Koperasi sebagaimana yang disebut dalam Akta Suruhanjaya Koperasi Malaysia 2006.";

(c) dalam subseksyen (2) —

(i) dengan memasukkan selepas perkataan "setiap tahun kewangan," perkataan "sebelum mengisytiharkan apa-apa dividen"; dan

(ii) dengan menggantikan perkataan "Menteri" dengan perkataan "Suruhanjaya";

(d) dalam subseksyen (5) —

(i) dalam perenggan (a), dengan memotong perkataan "dan pulangan atas deposit";

(ii) dengan menggantikan perenggan (b) dengan perenggan yang berikut:

"(b) pembayaran dividen, atas syer dan yuran anggota koperasi sebagaimana yang ditentukan oleh arahan atau garis panduan:

Dengan syarat bahawa, pembayaran dividen daripada mana-mana sumber selain untung bersih teraudit bagi tahun kewangan itu tidak boleh dibuat kecuali dengan mendapat kelulusan bertulis terlebih dahulu daripada Suruhanjaya yang tidak boleh dalam mana-mana hal melebihi apa-apa kadar maksimum sebagaimana yang ditentukan dalam arahan atau garis panduan itu;"

(iii) dalam perenggan (c), dengan menggantikan perkataan "diluluskan oleh Ketua Pendaftar;"

dengan perkataan "disyorkan oleh mesyuarat agung tahunan dan diluluskan oleh Suruhanjaya; atau"; dan

(iv) dengan menggantikan perenggan (*d*) dengan perenggan yang berikut:

"(*d*) pembayaran untuk kebajikan anggotanya dan masyarakat."; dan

(*e*) dalam subseksyen (6), dengan memotong perkataan "pulangan atas deposit atau".

Pindaan seksyen 58

51. Seksyen 58 Akta.ibu dipinda dengan memasukkan selepas subseksyen (5) subseksyen yang berikut:

"(6) Mana-mana koperasi atau pegawai koperasi yang tidak mematuhi subseksyen (1), (2), (3) atau (4) melakukan suatu kesalahan dan boleh, apabila disabitkan, didenda tidak melebihi dua ratus ribu ringgit dan boleh, sebagai tambahan, didenda harian tidak melebihi lima ratus ringgit bagi setiap hari kesalahan itu berterusan selepas sabitan."

Pindaan seksyen 59

52. Seksyen 59 Akta ibu dipinda—

(*a*) dalam perenggan (*l*)(*a*), dengan menggantikan perkataan "penyata sumber dan penggunaan wang" dengan perkataan "dan apa-apa penyata sebagaimana yang ditentukan oleh Suruhanjaya,";

(*b*) dalam perenggan (*l*)fcj, dengan memasukkan selepas perkataan "jika ada;" perkataan "dan";

(*c*) dalam perenggan (*l*)(*d*), dengan menggantikan perkataan "; dan" di hujung perenggan itu dengan noktah;

(*d*) dengan memotong perenggan (*l*)(*e*);

(*e*) dengan memasukkan selepas subseksyen (2) subseksyen yang berikut:

"(2A) Semua pandangan Suruhanjaya yang mempunyai kesan kewangan terhadap akaun teraudit dan kunci

kira-kira koperasi hendaklah diselaraskan dengan sewajarnya oleh koperasi dan ditunjukkan dengan jelas dalam akaun teraudit koperasi dalam tahun kewangan yang berikutnya.";

- (f) dalam perenggan (3)(b), dengan menggantikan perkataan "amaun" dengan perkataan "kadar dan amaun";
- (g) dengan memasukkan selepas perenggan (3)(b) perenggan yang berikut:
 - "(ba) penerbitan syer bonus, jika ada, dan kriterianya;"
- (h) dalam perenggan 3(e), dengan memotong perkataan "dan" di hujung perenggan itu;
- (i) dalam perenggan (3)(f), dengan menggantikan noktah di hujung perenggan itu dengan perkataan "; dan";
- (j) dengan memasukkan selepas perenggan (3)(f) perenggan yang berikut:
 - "(g) sama ada semua pelarasan menurut subseksyen 59(2A) telah dijalankan dengan sewajarnya."; dan
- (k) dengan memasukkan selepas subseksyen (5) subseksyen yang berikut:
 - "(6) Mana-mana koperasi atau pegawai koperasi yang tidak mematuhi subseksyen (1) melakukan suatu kesalahan dan boleh, apabila disabitkan, didenda tidak melebihi dua ratus ribu ringgit dan boleh, sebagai tambahan, didenda harian lima ratus ringgit bagi setiap hari kesalahan itu berterusan selepas sabitan."

Pindaan seksyen 60

53. Seksyen 60 Akta ibu dipinda dengan menggantikan subseksyen (1) dengan subseksyen yang berikut:

"(1) Tiap-tiap koperasi hendaklah menyebabkan akaunnya diaudit sekurang-kurangnya sekali pada tiap-tiap tahun kewangan oleh—

- (a) seorang juruaudit yang diluluskan oleh Suruhanjaya; atau
- (b) seorang pegawai Suruhanjaya."

Pindaan seksyen 61

54. Seksyen 61 Akta ibu dipinda—

- (a) dalam subseksyen (1), dengan memasukkan selepas perkataan "sebagaimana ditetapkan" perkataan "dan tertakluk kepada apa-apa terma dan syarat yang disifatkannya patut"; dan
- (b) dengan menggantikan subseksyen (3) dengan subseksyen yang berikut:

"(3) Kelulusan bagi pelantikan juruaudit di bawah subseksyen (1) boleh dibatalkan jika Suruhanjaya berpendapat bahawa audit yang dijalankan oleh juruaudit itu tidak memuaskan."

Pindaan seksyen 62

55. Seksyen 62 Akta ibu dipinda—

- (a) dalam perenggan (a), dengan memotong perkataan "bagi sejumlah wang yang melebihi sepuluh ribu ringgit";
- (b) dengan memasukkan selepas perenggan (a) perenggan yang berikut:

"(aa) dia ialah seorang anggota koperasi atau seorang suami atau isteri kepada pegawai koperasi itu;"
dan

- (c) dalam perenggan (e), dengan memasukkan selepas perkataan "dia telah" perkataan "dikompaunkan atau".

Pindaan seksyen 63

56. Seksyen 63 Akta ibu dipinda dengan memasukkan selepas subseksyen (5) subseksyen yang berikut:

" (6) Mana-mana juruaudit yang tidak mematuhi seksyen ini melakukan suatu kesalahan dan boleh, apabila disabitkan, didenda tidak melebihi dua ratus ribu ringgit atau dipenjarakan selama tempoh tidak melebihi satu tahun atau kedua-duanya."

Pindaan seksyen 64**57.** Seksyen 64 Akta ibu dipinda—

- (a) dengan memasukkan selepas perkataan "khas dengan bertulis" perkataan "boleh memeriksa, dengan atau tanpa notis, mana-mana koperasi dan bagi maksud pemeriksaan itu";
- (b) dengan menggantikan perkataan "subsidiarinya" di mana-mana jua terdapat dalam seksyen itu dengan perkataan "perbadanan berkaitan";
- (c) dengan menggantikan noktah di hujung seksyen itu dengan noktah bertindih; dan
- (d) dengan memasukkan selepas seksyen 64 proviso yang berikut:

"Dengan syarat bahawa, setakat yang selaras dengan perjalanan pemeriksaan itu, apa-apa buku, akaun, dokumen, sekuriti dan wang tunai itu tidak dikehendaki untuk dikemukakan pada bila-bila masa atau di mana-mana tempat yang boleh mengganggu perjalanan yang sepatutnya urusan harian biasa koperasi itu atau perbadanan berkaitannya."

Pindaan seksyen 65**58.** Akta ibu dipinda dengan menggantikan seksyen 65 dengan seksyen yang berikut:

"65. (1) Jika, dalam perjalanan, atau berikutan dengan suatu pemeriksaan di bawah seksyen 64, ternyata bahawa suatu kesalahan di bawah Akta ini, peraturan-peraturan atau perintah telah dilakukan, Suruhanjaya atau pegawai yang diberi kuasa oleh Suruhanjaya secara bertulis untuk membuat pemeriksaan itu boleh memasuki mana-mana premis yang dipunyai oleh atau dihuni oleh koperasi itu atau mana-mana tempat lain yang -dipercayai boleh membantu pemeriksaan atau penyiasatan dan boleh menyita dan menahan apa-apa buku, akaun, dokumen sekuriti dan wang tunai koperasi itu yang boleh memberikan keterangan bagi sesuatu kesalahan di bawah Akta ini, peraturan-

peraturan atau perintah, jika pada pendapat Suruhanjaya atau pegawainya yang diberi kuasa itu —

- (a) pemeriksaan buku, akaun, dokumen, sekuriti dan wang tunai itu, penyalinannya atau pembuatan cabutan daripadanya, tidak dapat dengan semunasabahnya diusahakan tanpa menyita atau merampasnya;
- (b) buku, akaun, dokumen, sekuriti dan wang tunai itu boleh diganggu atau dimusnahkan melainkan jika ia disita atau dirampas; atau
- (c) buku, akaun, dokumen, sekuriti dan wang tunai itu mungkin diperlukan sebagai keterangan dalam mana-mana prosiding undang-undang, sama ada sivil atau jenayah, yang boleh dimulakan di bawah atau berkaitan dengan Akta ini, Akta Suruhanjaya Koperasi Malaysia 2006 atau mana-mana undang-undang bertulis lain.

(2) Tiada koperasi atau pegawai koperasi boleh—

(a) gagal untuk—

(i) membenarkan akses kepada; (ii)

memberi milikan; atau (iii)

mengemukakan,

buku, akaun, dokumen, sekuriti atau wang tunainya; atau

(b) gagal untuk memberi maklumat atau kemudahan,

sebagaimana yang diperuntukkan oleh seksyen ini.

(3) Mana-mana koperasi atau pegawai koperasi yang tidak mematuhi subseksyen (1) atau (2) melakukan suatu kesalahan dan boleh, apabila disabitkan—

(a) dalam hal suatu koperasi, didenda tidak melebihi satu juta ringgit; atau

(b) dalam hal seorang pegawai koperasi, didenda tidak melebihi satu juta ringgit atau dipenjarakan selama tempoh tidak melebihi satu tahun atau kedua-duanya."

Pindaan seksyen 66

59. Seksyen 66 Akta ibu dipinda dengan menggantikan subseksyen (1) dan (2) dengan subseksyen yang berikut:

"66. (1) Suruhanjaya boleh, sama ada atau tidak, berikutan dengan suatu pemeriksaan di bawah seksyen 64 atau audit di bawah seksyen 60, mengadakan suatu siasatan atau mengarahkan mana-mana orang yang diberi kuasa oleh Suruhanjaya melalui perintah secara bertulis bagi pihaknya untuk mengadakan suatu siasatan tentang penubuhan, perjalanan dan kedudukan kewangan koperasi itu dan perbadanan berkaitannya, jika ada.

(2) Bagi maksud suatu siasatan di bawah subseksyen (1), Suruhanjaya atau orang yang diberi kuasa yang disebut dalam subseksyen (1) boleh memanggil mana-mana orang, yang Suruhanjaya atau orang yang diberi kuasa ada sebab untuk percaya, mempunyai pengetahuan tentang mana-mana hal ehwal koperasi itu dan boleh memeriksa orang itu dengan sumpah dan boleh menghendaki mana-mana orang untuk mengemukakan atau menyerahkan apa-apa buku, akaun dan dokumen dalam jagaannya yang dipunyai oleh koperasi itu dan perbadanan berkaitannya, jika ada, jika Suruhanjaya atau orang yang diberi kuasa itu mempunyai sebab untuk mempercayai bahawa buku, akaun dan dokumen itu boleh memberikan keterangan tentang sesuatu kesalahan di bawah Akta ini, peraturan-peraturan atau perintah."

Penggantian seksyen 69

60. Akta ibu dipinda dengan menggantikan seksyen 69 dengan seksyen yang berikut:

"Tindakan oleh Suruhanjaya berkenaan dengan koperasi dalam hal keadaan tertentu

69. (1) Suruhanjaya selepas menjalankan kuasanya di bawah seksyen 64 atau 66, mengikut mana-mana yang berkenaan,

dan jika Suruhanjaya berpuas hati bahawa sesuatu koperasi itu

- (a) menjalankan perniagaannya mengikut suatu cara yang memudaratkan kepentingan koperasi, anggotanya, pendepositnya, sektor koperasi atau orang awam secara amnya;
- (b) adalah tidak solven, atau telah menjadi atau berkerungkinan akan menjadi tidak berupaya untuk menunaikan kesemua atau mana-mana obligasinya, atau hampir hendak menggantung pembayaran kepada mana-mana pemiutang; atau
- (c) telah melanggar mana-mana peruntukan Akta ini atau Akta Suruhanjaya Koperasi Malaysia 2006, atau mana-mana syarat pendaftarannya di bawah seksyen 7 atau mana-mana undang-undang bertulis, tidak kira bahawa tiada dakwaan jenayah berkenaan dengannya,

maka Suruhanjaya boleh, melalui perintah secara bertulis, menjalankan mana-mana satu atau lebih kuasa yang berikut, sebagaimana yang Suruhanjaya sifatkan perlu:

- (i) menghendaki koperasi itu supaya mengambil apa-apa langkah, atau apa-apa tindakan, atau melakukan atau menahan daripada melakukan apa-apa perbuatan atau perkara, berhubung dengan koperasi itu, atau urusannya atau aktivitinya, atau pegawai-pegawainya;
- fii) melarang sesuatu koperasi daripada melanjutkan apa-apa pembiayaan Islam atau kemudahan kredit bagi apa-apa tempoh sebagaimana yang dinyatakan dalam perintah itu, dan menjadikan larangan itu tertakluk kepada apa-apa syarat sebagaimana yang dikenakan oleh Suruhanjaya, dan melalui perintah lanjutan yang seumpamanya dibuat, melanjutkan tempoh yang disebut terdahulu;
- (iii) memecat mana-mana pegawai koperasi itu jika ia adalah demi kepentingan koperasi bagi Suruhanjaya untuk berbuat demikian, tetapi tiada seorang pun boleh dipecat tanpa diberi suatu peluang untuk didengar,

Rang Undang-Undang

dan apa-apa kekosongan yang wujud akibat pemecatan itu hendaklah diisi mengikut cara yang diperuntukkan dalam undang-undang kecil koperasi itu;

- (iv) walau apa pun seksyen 42 —
 - (A) menggantung atau memecat daripada jawatan mana-mana anggota Lembaga koperasi; atau
 - (B) melantik mana-mana orang atau orang sebagai anggota Lembaga koperasi itu, dan memperuntukkan supaya orang itu dibayar oleh koperasi itu apa-apa saraan; atau
 - (C) membubarkan Lembaga koperasi itu;
- (v) melantik seseorang untuk menasihati koperasi berhubung dengan perjalanan urusan atau aktiviti yang sepatutnya, dan mengadakan peruntukan dalam perintah itu supaya orang yang dilantik itu dibayar oleh koperasi itu apa-apa saraan; atau
- (vi) membekukan akaun koperasi yang dipegang dalam koperasi lain atau bank bagi mengelakkan kerugian atau penyalahgunaan dana koperasi itu.

(2) Jika mana-mana hal keadaan yang dinyatakan dalam perenggan (1)(a), (b) atau (c) wujud berkenaan dengan sesuatu koperasi, Suruhanjaya boleh, sama ada atau tidak ia telah menjalankan mana-mana kuasanya di bawah subperenggan (1)(i), (ii), (iii), (iv), (v) atau (vi) melalui perintah yang disiarkan dalam *Warta* —

- (a) bagi Suruhanjaya atau mana-mana orang yang dilantik oleh Suruhanjaya untuk mengambil alih kawalan —
 - (i) semua harta, urusan, aktiviti dan hal ehwal koperasi itu, dan menjalankan kesemua urusan, aktiviti dan hal ehwalnya; atau
 - (ii) mana-mana bahagian daripada harta, urusan, aktiviti dan hal ehwal koperasi itu, dan menjalankan apa-apa bahagian daripada urusan, aktiviti dan hal ehwalnya; dan

- (b) bagi kos dan perbelanjaan Suruhanjaya, atau saraan orang yang dilantik di bawah subseksyen (1), kena dibayar daripada dana dan harta koperasi sebagai suatu caj pertama; atau
- (c) untuk memerintahkan pembubaran koperasi itu.

(3) Suatu perintah Suruhanjaya di bawah subseksyen (1) atau (2) boleh, dari semasa ke semasa, diubah suai, dipinda, diubah atau diganti sama ada secara prospektif, atau jika ia praktikal atau tidak adil untuk berbuat demikian, secara ke belakang, melalui suatu perintah selanjutnya di bawah subseksyen (1) atau (2), mengikut mana-mana yang berkenaan.

(4) Mana-mana orang yang terkilan dengan perintah Suruhanjaya yang dibuat di bawah subperenggan (1)(i), (ii), (iii), (iv), (v) atau (vi) boleh, dalam masa dua puluh satu hari dari pembuatan perintah itu, merayu kepada Menteri, yang hendaklah mengesahkan atau mengetepikan perintah itu dan keputusan Menteri itu hendaklah muktamad dan konklusif.

(5) Mana-mana koperasi atau pegawai koperasi yang tidak mematuhi subperenggan (1)(i) atau (ii) melakukan suatu kesalahan dan boleh, apabila disabitkan, didenda tidak melebihi satu juta ringgit atau dipenjarakan selama tempoh tidak melebihi satu tahun atau kedua-duanya.

(6) Bagi maksud seksyen ini dan seksyen 69c "orang yang dilantik" ertinya orang yang dilantik oleh Suruhanjaya, untuk bertindak bagi pihaknya, untuk mengambil alih kawalan di bawah perenggan (2)(a)."

Seksyen baru 69A, 69B, 69C dan 69D

61. Akta ibu dipinda dengan memasukkan selepas seksyen 69 seksyen yang berikut:

"Peruntukan berhubung dengan pelantikan di bawah seksyen 69

69A. (1) Seseorang yang dilantik oleh Suruhanjaya di bawah subsubperenggan 69(1)(iv)(B) atau perenggan 69(2)(a) hendaklah menguruskan hal ehwal koperasi itu sehingga

Lembaga baru dipilih di bawah undang-undang kecil koperasi itu atau, jika perintah yang dibuat di bawah subseksyen 69(1) diketepikan oleh Menteri di bawah subseksyen 69(4).

(2) Seseorang yang dilantik oleh Suruhanjaya di bawah subsubperenggan 69(1)(iv)(B), subperenggan 69(1)(v) atau perenggan 69(2)(a) hendaklah dilantik bagi suatu tempoh tidak melebihi dua tahun, tetapi boleh dilantik semula bagi tiga tempoh lanjutan berturut-turut yang tidak melebihi satu tahun setiapnya, dan hendaklah, selama tempoh pelantikan atau pelantikan semula itu, memegang pelantikan atau pelantikan semulanya mengikut budi bicara Suruhanjaya.

(3) Terma dan syarat sesuatu pelantikan yang disebut dalam subseksyen (1) hendaklah ditentukan oleh Suruhanjaya dan hendaklah mengikat koperasi berkenaan.

(4) Pelantikan seseorang anggota Lembaga koperasi di bawah subsubperenggan 69(1)(iv)(B) tidak menjejaskan mana-mana peruntukan undang-undang kecil yang membolehkan koperasi itu mempunyai anggota tambahan Lembaga jika bilangan maksimum anggota Lembaga yang dibenarkan di bawah seksyen 42 belum lagi mencapai atau melebihi pelantikan itu.

(5) Seseorang yang dilantik di bawah subseksyen (1) tidak bertanggungjawab kepada koperasi atau menanggung apa-apa obligasi kepada mana-mana anggota atau kepada mana-mana orang bagi apa-apa tindakan yang dilakukan olehnya dengan suci hati, semata-mata oleh sebab dia memegang jawatan itu.

Peruntukan berhubung dengan pemecatan jawatan di bawah subperenggan 69(1)(iii) atau subsubperenggan 69(1)(iv)(A)

69B. (1) Mana-mana orang yang dipecat daripada jawatan di bawah subperenggan 69(1)(iii) atau subsubperenggan 69(1)(iv)(A) hendaklah terhenti memegang jawatan yang dia dipecat mulai tarikh yang ditetapkan dalam perintah itu, dan tidak boleh selepas itu memegang apa-apa jawatan

lain dalam koperasi itu atau, mengikut apa-apa cara, sama ada secara langsung atau tidak langsung, kena mengena dengan, atau mengambil bahagian, atau terlibat dalam, apa-apa urusan, aktiviti atau hal ehwal berhubung dengan koperasi itu.

(2) Mana-mana pegawai koperasi yang tidak mematuhi subseksyen (1) melakukan suatu kesalahan dan boleh, apabila disabitkan, didenda tidak melebihi satu juta ringgit atau dipenjarakan selama tempoh tidak melebihi satu tahun atau kedua-duanya dan boleh, sebagai tambahan, didenda harian satu ratus ringgit bagi setiap hari kesalahan itu berterusan selepas sabitan.

Peruntukan berhubung dengan pengambilalihan kawalan di bawah perenggan 69(2)(a)

69c. (1) Jika kawalan sesuatu koperasi telah diambil alih menurut suatu perintah di bawah perenggan 69(2)(a), koperasi itu dan pegawainya hendaklah menyerahkan harta, urusan, aktiviti dan hal ehwalnya kepada kawalan itu, dan hendaklah memperuntukkan kepada Suruhanjaya dan, jika kawalan itu diambil alih oleh orang yang dilantik di bawah perenggan 69(2)(a), kepada orang yang dilantik itu, segala kemudahan sebagaimana yang dikehendaki untuk menjalankan urusan, aktiviti dan hal ehwal koperasi itu.

(2) Sepanjang tempoh kawalan sesuatu koperasi menurut suatu perintah di bawah perenggan 69(2)(a), hendaklah terletak hak pada Suruhanjaya, atau pada orang yang dilantik itu, mengikut mana-mana yang berkenaan, semua kuasa koperasi itu, anggotanya dan anggota Lembaganya, di bawah undang-undang kecil koperasi itu, atau yang boleh dijalankan oleh koperasi itu atau anggotanya atau anggota Lembaganya di bawah mana-mana undang-undang bertulis, tidak kira sama ada kuasa itu boleh dijalankan melalui ketetapan, ketetapan khas, atau mengikut apa-apa cara lain, dan apa-apa kesulitan yang timbul berhubung dengannya boleh diselesaikan oleh Menteri melalui arahan secara bertulis.

(3) Selama tempoh berkuat kuasanya suatu perintah di bawah perenggan 69(2)(a), tiada anggota Lembaga koperasi yang dimaksudkan oleh perintah itu boleh, sama ada secara langsung atau tidak langsung, terlibat dalam apa-apa urusan, aktiviti dan hal ehwal berhubung dengan koperasi itu, melainkan jika dikehendaki atau dibenarkan oleh Suruhanjaya atau orang yang dilantik itu dan tiada saraan daripada apa jua jenis boleh terakru atau kena dibayar kepada mana-mana anggota Lembaga koperasi itu, melainkan jika ia diluluskan secara bertulis oleh Suruhanjaya atau orang yang dilantik itu berhubung dengan apa-apa urusan, aktiviti dan hal ehwal yang dikehendaki atau dibenarkan oleh Suruhanjaya atau orang yang dilantik itu.

(4) Suatu perintah di bawah perenggan 69(2)(a) tidak mempunyai kesan sebagai memberi kepada, atau meletakhakkan pada, Suruhanjaya atau orang yang dilantik itu, apa-apa hakmilik kepada, atau apa-apa kepentingan benefisial dalam, apa-apa harta koperasi yang dikaitkan dengan perintah itu.

(5) Mana-mana pegawai koperasi yang tidak mematuhi subseksyen (1) atau (3) melakukan suatu kesalahan dan boleh, apabila disabitkan, didenda tidak melebihi satu juta ringgit atau dipenjarakan selama tempoh tidak melebihi satu tahun atau kedua-duanya dan boleh, sebagai tambahan, didenda harian satu ratus ringgit bagi setiap hari kesalahan itu berterusan selepas sabitan.

Penyelesaian penjalanan kuasa di bawah subseksyen 69(1) dan (2) oleh Suruhanjaya

69D. (1) Suruhanjaya hendaklah menyelesaikan apa-apa penjalanan kuasa di bawah subseksyen 69(1) atau (2) dalam tempoh yang tidak melebihi dua tahun melainkan jika tempoh itu dilanjutkan oleh Menteri.

(2) Menteri boleh melanjutkan tempoh di bawah subseksyen (1) bagi tiga tempoh lanjutan berturut-turut yang tidak melebihi satu tahun setiapnya.

(3) Setelah tamat apa-apa tempoh yang disebut dalam subseksyen (1) atau (2), dan jika pada pendapat Suruhanjaya, Suruhanjaya belum lagi selesai menjalankan kuasanya di bawah subseksyen 69(1) atau (2), Suruhanjaya boleh membubarkan koperasi itu.

(4) Jika Suruhanjaya berpendapat bahawa apa-apa perjalanan kuasa yang disebut dalam subseksyen 69(1) atau (2) telah diselesaikan, Suruhanjaya hendaklah menyerahkan apa-apa harta, urusan, aktiviti dan hal ehwal koperasi kepada Lembaga yang baru dilantik dan menyebabkan suatu notis mengenai hal itu yang menyatakan tarikh perjalanan kuasa itu telah diselesaikan untuk disiarkan dalam *Warta*".

Pindaan seksyen 70

62. Seksyen 70 Akta ibu dipinda—

- (a) dengan memasukkan selepas perkataan "telah dipecat atas" perkataan "suatu"; dan
- (b) dengan menggantikan perkataan "peruntukan subseksyen 69(6)" dengan perkataan "subperenggan 69(1)(iii) atau subsubperenggan 69(1)(iv)(A)".

Pindaan seksyen 71

63. Seksyen 71 Akta ibu dipinda—

- (a) dengan menggantikan subseksyen (1) dengan subseksyen yang berikut:

"(1) Suruhanjaya boleh, jika Suruhanjaya berpendapat bahawa sesuatu koperasi itu patut dibubarkan, membubarkan koperasi itu dengan membuat suatu perintah pembatalan pendaftaran koperasi itu —

- (a) apabila Suruhanjaya menjalankan kuasanya di bawah subseksyen 69D(3);
- (b) apabila menerima suatu permohonan yang dibuat oleh tiga per empat daripada anggota sesuatu koperasi itu; atau

- (c) selepas suatu pemeriksaan telah dibuat di bawah seksyen 64 atau 68 atau selepas suatu siasatan telah dijalankan di bawah seksyen 66.";
- (b) dalam subseksyen (5) —
 - (i) dalam teks bahasa kebangsaan, dengan menggantikan perkataan "dia" dengan perkataan "Suruhanjaya";
 - fii) dalam teks bahasa Inggeris, dengan menggantikan perkataan "he" di mana-mana jua terdapat dengan perkataan "the Commission"; dan
 - fiii) dengan menggantikan perkataan "aset" dengan perkataan "harta"; dan
- (c) dalam subseksyen (6), dengan menggantikan perkataan "digulung" dengan perkataan "dibubarkan".

Pemotongan seksyen 71A, 71B dan 71c

64. Akta ibu dipinda dengan memotong seksyen 71A, 71B dan 71c.

Pindaan seksyen 72

- 65.** Seksyen 72 Akta ibu dipinda dalam subseksyen (1) —
- (a) dengan menggantikan perkataan "dia" dengan perkataan "Suruhanjaya"; dan
 - (b) dengan menggantikan perkataan "sepuluh" dengan perkataan "lima belas".

Pindaan seksyen 73

66. Seksyen 73 Akta ibu dipinda dengan menggantikan perkataan "71, 71A atau di bawah seksyen 72" dengan perkataan "71 atau 72".

Penggantian seksyen 74

67. Akta ibu dipinda dengan menggantikan seksyen 74 dengan seksyen yang berikut:

"Pembubaran selepas pembatalan pendaftaran koperasi

74. Jika pendaftaran sesuatu koperasi dibatalkan di bawah seksyen 71 atau 72, Suruhanjaya boleh melantik seorang yang berwibawa termasuklah seorang pegawai Suruhanjaya untuk menjadi pelikuidasi koperasi itu."

Pindaan seksyen 75

68. Seksyen 75 Akta ibu dipinda—

- (a) dalam subseksyen (2), dengan menggantikan perkataan "koperasi kredit" dengan perkataan "koperasi ditetapkan";
- (b) dalam subseksyen (7) teks bahasa Inggeris, dengan menggantikan perkataan "him" di mana-mana jua terdapat dengan perkataan "it"; dan
- (c) dengan menggantikan subseksyen (8) dengan subseksyen yang berikut:

"(8) Wang yang dipegang dalam Akaun Pelikuidasian Koperasi boleh didepositkan atau dilaburkan mengikut peraturan-peraturan, dan pendapatan bersih daripada deposit atau pelaburan itu hendaklah dikreditkan kepada Kumpulan Wang Pusat Koperasi yang hendaklah dipegang dan ditadbirkan oleh Suruhanjaya mengikut peraturan-peraturan."

Pindaan seksyen 77

69. Akta ibu dipinda dengan menggantikan seksyen 77 dengan seksyen yang berikut:

"77. Sesuatu perintah yang dibuat oleh pelikuidasi atau oleh Suruhanjaya di bawah seksyen 75 atau 76 hendaklah dikuatkuasakan oleh mana-mana mahkamah."

Pindaan seksyen 79

70. Subseksyen 79(1) Akta ibu dipinda dengan memotong perkataan "modal".

Pindaan seksyen 80

71. Seksyen 80 Akta ibu dipinda—

(a) dengan menggantikan subseksyen (1) dengan subseksyen yang berikut:

"(1) Jika, semasa pembubaran sesuatu koperasi atau berikutan dengan suatu audit di bawah seksyen 60 atau suatu pemeriksaan di bawah seksyen 64 atau 68 atau suatu siasatan di bawah seksyen 66 atau suatu penyiasaan di bawah Bahagian VI Akta Suruhanjaya Koperasi Malaysia 2006, ternyata bahawa mana-mana orang yang telah mengambil bahagian dalam pengelolaan atau pengurusan koperasi itu atau mana-mana pegawai koperasi terdahulu atau sekarang, ejen, atau anggota koperasi itu telah menyalahgunakan atau menyimpan atau menjadi bertanggung pada atau bertanggungjawab bagi apa-apa wang atau harta koperasi itu atau telah melakukan misfeasans atau pecah amanah berhubung dengan koperasi itu, Suruhanjaya boleh, atas usulnya sendiri atau atas permohonan pelikuidasi atau penyumbang, memeriksa kelakuan orang itu dan membuat suatu perintah yang menghendaknya membayar atau memulangkan wang atau harta atau mana-mana bahagiannya dengan pulangan atau bunga pada kadar yang difikirkan adil oleh Suruhanjaya atau menyumbangkan sejumlah wang itu kepada aset koperasi itu sebagai pampasan berkenaan dengan penyalahgunaan, penyimpanan, ketidakjujuran atau pecah amanah itu sebagaimana yang difikirkan adil oleh Suruhanjaya."; dan

(b) dalam subseksyen (2), dengan menggantikan perkataan "Sesuatu" dengan perkataan "Walau apa pun undang-undang bertulis lain, sesuatu".

Pindaan seksyen 81

72. Seksyen 81 Akta ibu dipinda dengan memotong perkataan "71B atau".

Pindaan seksyen 82

73. Seksyen 82 Akta ibu dipinda—

- (a) dalam perenggan (3)(a) teks bahasa Inggeris, dengan menggantikan perkataan "himself dengan perkataan "by itself;
- (b) dalam perenggan (3)(b), dengan memotong perkataan "atau"; dan
- (c) dengan memasukkan selepas perenggan (3)(b) perenggan yang berikut:

"(ba) merujuk pertikaian itu kepada tribunal yang ditubuhkan di bawah seksyen 83; atau".

Pindaan seksyen 83

74. Seksyen 83 Akta ibu dipinda—

- (a) dalam subseksyen (2), dengan menggantikan perkataan "hendaklah" dengan perkataan "boleh"; dan
- (b) dalam subseksyen (4), dengan menggantikan perkataan "hendaklah dirujuk kepada tribunal itu" dengan perkataan "boleh dirujuk kepada tribunal itu oleh Suruhanjaya".

Seksyen baru 84A

75. Akta ibu dipinda dengan memasukkan selepas seksyen 84 seksyen yang berikut:

"Perniagaan koperasi berasaskan Syariah

84A. (1) Mana-mana koperasi yang menjalankan perniagaan atau aktiviti yang berasaskan Syariah boleh, dari semasa ke semasa, mendapatkan nasihat daripada Majlis Penasihat Syariah mengenai operasi perniagaannya atau aktivitinya bagi memastikan bahawa ia mengikut Syariah.

(2) Mana-mana koperasi yang menjalankan perniagaan di bawah subseksyen (1) hendaklah mematuhi apa-apa arahan bertulis yang dikeluarkan dari semasa ke semasa oleh Suruhanjaya, selepas berunding dengan Majlis Penasihat Syariah.

(3) Bagi maksud seksyen ini, "Majlis Penasihat Syariah" ertinya Majlis Penasihat Syariah yang ditubuhkan di bawah subseksyen 16B(1) Akta Bank Negara Malaysia 1958 [Akta 579].".

Seksyen baru 85A

76. Akta ibu dipinda dengan memasukkan selepas seksyen 85 seksyen yang berikut:

"Mengemukakan maklumat dan statistik

85A. (1) Sesuatu koperasi, seseorang pegawai koperasi, seseorang anggota koperasi atau mana-mana orang yang dikehendaki oleh Suruhanjaya hendaklah mengemukakan kepada Suruhanjaya apa-apa penyata, statistik, dokumen atau maklumat dalam apa-apa masa dan mengikut apa-apa cara atau bentuk sebagaimana yang boleh dikehendaki oleh Suruhanjaya melalui notis secara bertulis.

(2) Suruhanjaya boleh menghendaki dokumen atau maklumat yang dikemukakan di bawah subseksyen (1) untuk disahkan dengan sewajarnya oleh juruaudit.

(3) Mana-mana penyata, statistik, dokumen atau maklumat yang dikemukakan kepada Suruhanjaya di bawah subseksyen (1) hendaklah benar, tepat dan lengkap.

(4) Jika maklumat yang diperoleh oleh Suruhanjaya di bawah subseksyen (1) berhubung dengan akaun atau hal ehwal anggota koperasi, maklumat itu hendaklah dianggap sebagai rahsia antara Suruhanjaya dengan anggota koperasi itu.

(5) Sesuatu koperasi hendaklah menzahirkan maklumat kepada mana-mana biro kredit sebagaimana yang ditentukan oleh Suruhanjaya.

(6) Bagi maksud subseksyen (5), apa-apa maklumat yang diterima daripada sesuatu koperasi oleh biro kredit hendaklah dianggap rahsia antara koperasi dengan biro kredit itu.

(7) Mana-mana koperasi, pegawai koperasi, anggota koperasi atau mana-mana orang yang tidak mematuhi subseksyen (1), (2), (3), (4), (5) atau (6) melakukan suatu

kesalahan dan boleh, apabila disabitkan, didenda tidak melebihi dua ratus ribu ringgit dan boleh sebagai tambahan, didenda harian satu ratus ringgit bagi setiap hari kesalahan itu berterusan selepas sabitan."

Pindaan seksyen 86

77. Akta ibu dipinda dengan menggantikan seksyen 86 dengan seksyen yang berikut:

"86. (1) Suruhanjaya boleh, dengan kelulusan Menteri, membuat apa-apa peraturan di bawah seksyen ini sebagaimana yang perlu bagi maksud melaksanakan atau memberikan kuat kuasa kepada prinsip dan peruntukan Akta ini.

(2) Khususnya, tanpa menjejaskan keluasan kuasa yang diberikan oleh subseksyen (1), peraturan-peraturan itu boleh —

- (a) menetapkan borang yang hendaklah digunakan dan syarat yang hendaklah dipatuhi dalam memohon pendaftaran sesuatu koperasi dan tatacara dalam hal permohonan itu;
- (b) menetapkan perkara yang berkenaan dengannya sesuatu koperasi hendaklah atau boleh membuat undang-undang kecil dan bagi tatacara yang hendaklah diikuti dalam membuat, meminda dan membatalkan undang-undang kecilnya termasuk undang-undang kecil yang tidak selaras dengan peruntukan Akta ini dan syarat-syarat yang hendaklah dipenuhi sebelum pembuatan, pindaan atau pembatalan itu;
- (c) menetapkan segala perkara yang berhubungan dengan pemilihan, pelantikan, tempoh jawatan dan kehilangan kelayakan anggota Lembaga sesuatu koperasi dan juruauditnya;
- (d) menetapkan cara bagaimana sesuatu perniagaan, aktiviti atau hal ehwal tertentu boleh dijalankan oleh sesuatu koperasi;
- (e) menetapkan maksud yang baginya simpanan khas sesuatu koperasi boleh digunakan;

- (f) menetapkan segala perkara yang berhubungan dengan penggabungan dan pembahagian mana-mana koperasi dan pemindahan aset dan liabiliti koperasi itu, termasuk—
 - fi) peletakhakan aset dan liabiliti —
 - (A) koperasi yang bergabung dalam koperasi gabungan itu;
 - (B) sesuatu koperasi dalam koperasi baru yang diwujudkan menurut sesuatu pembahagian; atau
 - (C) sesuatu koperasi dalam suatu koperasi lain menurut sesuatu pemindahan; dan
 - fii) pendaftaran koperasi gabungan, koperasi baru dan pembatalan pendaftaran, dalam hal suatu penggabungan, koperasi yang bergabung, dalam hal suatu pembahagian, koperasi yang sedia ada, dan dalam hal suatu pemindahan, koperasi yang membuat pemindahan;
- (g) menetapkan maksud yang baginya dana di dalam Akaun Rizab, selain yang berbangkit daripada keuntungan modal, boleh digunakan;
- (h) menetapkan cara bagaimana Kumpulan Wang Pusat Koperasi dan Akaun Pelikuidasian Koperasi hendaklah dipegang, ditadbir dan digunakan;
- (i) tertakluk kepada peruntukan nyata Akta ini, menentukan dalam hal yang bagaimana sesuatu rayuan boleh dibuat terhadap perintah Suruhanjaya dan menetapkan tatacara yang hendaklah diikuti dalam mengemukakan dan menyelesaikan rayuan itu;
- (j) menetapkan cara melantik seseorang penimbang tara dan tatacara yang hendaklah diikuti dalam prosiding di hadapan Suruhanjaya atau penimbang tara itu;
- (k) menetapkan tatacara yang hendaklah diikuti oleh pelikuidasi yang dilantik di bawah seksyen 74 dan hal yang mengenainya rayuan boleh dibuat terhadap perintah pelikuidasi itu;

- (I) menetapkan borang yang hendaklah digunakan, fi yang hendaklah dibayar, tatacara yang hendaklah dipatuhi dan semua perkara lain yang berkaitan dengan atau bersampingan dengan pengemukaan, pendengaran dan penyelesaian rayuan di bawah Akta ini atau peraturan-peraturan;
- (m) mengadakan peruntukan bagi penubuhan Majlis Perundingan Koperasi Kebangsaan;
- (n) menetapkan cara bagaimana Kumpulan Wang Amanah Pendidikan Koperasi, Kumpulan Wang Amanah Pembangunan Koperasi dan apa-apa kumpulan wang lain hendaklah dipegang, ditadbirkan dan digunakan;
- (o) mengadakan peruntukan bagi pelaburan wang sesuatu koperasi dalam bon atau debentur mana-mana koperasi, sekuriti mana-mana syarikat atau mana-mana pertubuhan perbadanan yang didaftarkan di Malaysia atau dalam subsidiarinya;
- (p) mengadakan peruntukan bagi pelaburan oleh sesuatu koperasi dalam harta tak alih;
- (q) mengadakan peruntukan bagi penerimaan deposit oleh sesuatu koperasi daripada orang yang bukan anggota koperasi itu;
- (r) menetapkan tatacara berkenaan dengan pembayaran bagi syer atau yuran yang dikeluarkan oleh anggota daripada Kumpulan Wang Rizab Statutori;
- (s) mengadakan peruntukan bagi penubuhan subsidiari koperasi dan semua perkara yang berhubungan dengannya;
- (t) menetapkan tatacara bagi pengeluaran syer, pulangan atau faedah anggota yang meninggal dunia oleh wakil yang sah, penama, waris atau mana-mana orang, mengikut mana-mana yang berkenaan;
- (u) menetapkan kontrak yang dibuat antara koperasi dengan anggota yang merupakan seorang kanak-kanak;
- (v) menetapkan kesalahan yang boleh dikompaun dan tatacara bagi mengkompaun kesalahan itu;
- (w) menetapkan perkara yang berhubungan dengan mesyuarat agung permulaan dan mesyuarat agung tahunan;

- (x) menetapkan tatacara berkenaan dengan pengeluaran dan pemindahan syer, pulangan atau kepentingan seseorang anggota apabila keanggotaan ditamatkan; dan
- (y) mengadakan peruntukan bagi apa-apa perkara lain yang disifatkan oleh Suruhanjaya suai manfaat atau perlu bagi maksud Akta ini.

(3) Tanpa menjejaskan peruntukan subseksyen (1) dan (2), Suruhanjaya boleh, dengan persetujuan Menteri dan Menteri Kewangan, membuat apa-apa peraturan sebagaimana yang perlu bagi maksud mengawal atau mengawal selia perniagaan, aktiviti atau hal ehwal, dan untuk mengadakan peruntukan bagi pengurusan yang lebih baik, koperasi berdaftar yang menjalankan perniagaan pengambilan deposit atau perniagaan insurans.

(4) Apa-apa peraturan yang dibuat di bawah seksyen ini boleh berhubung dengan kesemua, atau mana-mana kelas, kategori atau perihalan koperasi dan peruntukan yang berlainan boleh dibuat bagi koperasi, kelas, kategori atau perihalan koperasi yang berlainan.

(5) Mana-mana peraturan yang dibuat di bawah seksyen ini hendaklah disiarkan dalam *Warta*".

Seksyen baru 86A dan 86B

78. Akta ibu dipinda dengan memasukkan selepas seksyen 86 seksyen yang berikut:

"Kuasa untuk membuat perintah

86A. Suruhanjaya boleh, dengan kelulusan Menteri, membuat apa-apa perintah di bawah seksyen ini sebagaimana yang perlu bagi maksud melaksanakan atau memberikan kuat kuasa kepada prinsip dan peruntukan Akta ini.

Kuasa untuk mengeluarkan arahan, garis panduan, dll.

86B. (1) Suruhanjaya boleh mengeluarkan arahan, garis panduan, surat pekeliling atau notis berkenaan dengan mana-mana peruntukan Akta ini termasuk perkara yang dinyatakan dalam Jadual yang perlu atau suai manfaat untuk memberi kuat kuasa sepenuhnya kepada atau untuk menjalankan mana-mana peruntukan Akta ini.

(2) Suruhanjaya, dengan kelulusan Menteri boleh, dari semasa ke semasa, melalui perintah yang disiarkan dalam *Warta*, mengubah, memotong, menambah kepada, menggantikan, atau selainnya meminda Jadual di bawah subseksyen (1) dan apabila penyiaran perintah itu, Jadual, sebagaimana yang diubah, dipotong, ditambah kepada, digantikan atau selainnya dipinda, hendaklah berkuat kuasa penuh dan hendaklah disifatkan sebagai suatu bahagian integral Akta ini sebagaimana dari tarikh penyiaran itu, atau dari apa-apa tarikh terkemudian sebagaimana yang dinyatakan dalam perintah itu.

(3) Mana-mana arahan, garis panduan, surat pekeliling atau notis yang dikeluarkan di bawah subseksyen (1) boleh berhubung dengan kesemua, atau apa-apa kelas, kategori atau perihalan koperasi, dan peruntukan yang berlainan boleh dibuat untuk koperasi, kelas, kategori atau perihalan koperasi yang berlainan."

Pindaan seksyen 87

79. Akta ibu dipinda dengan menggantikan seksyen 87 dengan seksyen yang berikut:

"87. (1) Menteri boleh, apabila berpuas hati bahawa adalah wajar untuk berbuat demikian demi kepentingan perkembangan koperasi pada amnya atau sesuatu koperasi tertentu atau sesuatu kelas, kategori atau perihalan koperasi tertentu, melalui perintah am atau khas, tertakluk kepada apa-apa syarat yang boleh dikenakan olehnya, mengecualikan mana-mana koperasi atau kelas, kategori atau perihalan koperasi, daripada mana-mana peruntukan Akta ini, atau mengarahkan bahawa peruntukan itu hendaklah terpakai bagi mana-mana koperasi atau kelas, kategori atau perihalan koperasi, berkuat kuasa dari apa-apa tarikh atau dengan apa-apa ubah suaian sebagaimana yang dinyatakan dalam perintah itu.

(2) Apa-apa pengecualian yang dibuat di bawah subseksyen (1) hendaklah disiarkan dalam *Warta*".

Pemotongan seksyen 89

80. Akta ibu dipinda dengan memotong seksyen 89.

Pindaan seksyen 91

81. Akta ibu dipinda dengan menggantikan seksyen 91 dengan seksyen yang berikut:

"91. (1) Menjadi suatu kesalahan di bawah Akta ini jika—

- (a) sesuatu koperasi, seseorang pegawai koperasi atau seseorang anggota koperasi melakukan apa-apa perbuatan yang menghendaki keizinan atau kelulusan Suruhanjaya atau mesyuarat agung tanpa terlebih dahulu mendapat keizinan atau kelulusan itu;
- (b) sesuatu koperasi, seseorang pegawai koperasi atau seseorang anggota koperasi yang abai atau enggan melakukan sesuatu perbuatan atau perkara yang dikehendaki oleh atau di bawah Akta ini, peraturan-peraturan atau perintah, untuk dibuat; dan
- (c) sesuatu koperasi atau mana-mana orang yang melakukan atau menyebabkan dilakukan apa-apa perbuatan atau perkara yang dilarang oleh, atau tidak mematuhi kehendak Akta ini, peraturan-peraturan atau perintah.

(2) Mana-mana koperasi, pegawai koperasi anggota koperasi, atau mana-mana orang, yang melakukan kesalahan di bawah seksyen ini boleh, apabila disabitkan, didenda satu ratus ribu ringgit dan boleh sebagai tambahan, didenda harian satu ratus ringgit bagi setiap hari kesalahan itu berterusan selepas sabitan."

Pindaan seksyen 92

82. Seksyen 92 Akta ibu dipinda dengan menggantikan perkataan "mana-mana pegawai awam yang diberi kuasa secara bertulis oleh Ketua Pendaftar" dengan perkataan "pegawainya yang diberi kuasa olehnya".

Penggantian seksyen 93

83. Akta ibu dipinda dengan menggantikan seksyen 93 dengan seksyen yang berikut:

"Kuasa untuk mengkompaun kesalahan

93. (1) Pengerusi Eksekutif Suruhanjaya boleh, dengan keizinan secara bertulis Pendakwa Raya, mengkompaun

apa-apa kesalahan yang dilakukan oleh mana-mana orang yang boleh dihukum di bawah Akta ini atau mana-mana peraturan atau perintah yang dibuat di bawah Akta ini, dengan membuat suatu tawaran bertulis kepada orang itu untuk mengkompaun kesalahan itu dengan membayar kepada Suruhanjaya dalam apa-apa masa sebagaimana yang dinyatakan dalam tawaran itu apa-apa jumlah wang yang tidak melebihi lima puluh peratus daripada amaun denda maksimum termasuk denda harian, jika ada, dalam hal suatu kesalahan yang berterusan, yang boleh dikenakan kepada orang itu jika dia telah disabitkan atas kesalahan itu.

(2) Apa-apa wang yang dibayar kepada Suruhanjaya menurut peruntukan subseksyen (1) hendaklah dibayar ke dalam dan menjadi sebahagian daripada kumpulan wang operasi Suruhanjaya.

(3) Sesuatu tawaran di bawah subseksyen (1) boleh dibuat pada bila-bila masa selepas kesalahan itu dilakukan, tetapi sebelum apa-apa pendakwaan baginya telah dimulakan, dan jika amaun yang dinyatakan dalam tawaran itu tidak dibayar dalam masa yang dinyatakan dalam tawaran itu, atau apa-apa pelanjutan masa yang boleh diberikan oleh Suruhanjaya, pendakwaan bagi kesalahan itu boleh dimulakan pada bila-bila masa selepas itu terhadap orang yang kepadanya tawaran untuk mengkompaun itu dibuat.

(4) Jika sesuatu kesalahan telah dikompaun di bawah subseksyen (1), tiada pendakwaan boleh dimulakan selepas itu berkenaan dengan kesalahan itu terhadap orang yang kepadanya tawaran untuk mengkompaun itu dibuat."

Seksyen baru 93A

84. Akta ibu dipinda dengan memasukkan selepas seksyen 93 seksyen yang berikut:

"Mahkamah boleh memerintahkan pematuhan

93A. Jika sesuatu koperasi atau mana-mana orang telah disabitkan atas suatu kesalahan di bawah Akta ini, mahkamah boleh, sebagai tambahan kepada apa-apa denda atau

tempoh pemenjaraan yang boleh dikenakan, memerintahkan koperasi atau orang itu untuk membetulkan pelanggaran Akta ini yang berkenaan dengannya koperasi atau orang itu telah disabitkan."

Jadual baru

85. Akta ibu dipinda dengan memasukkan selepas seksyen 96 Jadual yang berikut:

"JADUAL

[Seksyen

86B]

SENARAI PERKARA YANG BOLEH DIKELUARKAN SECARA ARAHAN, GARIS PANDUAN, SURAT PEKELILING ATAU NOTIS

1. Pengenaan kewajipan, liabiliti, tanggungjawab, sekatan, batasan, larangan atau sanksi, atau pemberian hak, keistimewaan, faedah atau tanggung rugi kepada pegawai, wakil, anggota koperasi atau juruaudit.
2. Tadbir urus koperasi.
3. Maksud yang baginya dana dalam Akaun Rizab, selain yang berbangkit daripada keuntungan modal, boleh digunakan.
4. Kadar maksimum pembayaran dividen ke atas syer atau yuran, honorarium atau pulangan atas deposit.
5. Peruntukan bagi pemeriksaan dokumen dan daftar di pejabat Suruhanjaya serta fi yang kena dibayar baginya dan bagi pengeluaran salinan dokumen atau daftar itu.
6. Penyenggaraan dana mewakili syer yang dilanggan dan dibayar oleh anggota, yuran modalnya dan dana-dana lain yang berkaitan dengan anggotanya.
7. Bentuk dan kandungan penyata kewangan, standard perakaunan dan tatacara yang perlu dipatuhi oleh koperasi dalam menyediakan dan membentangkan penyata kewangan.
8. Penyenggaraan aset cair oleh koperasi.
9. Pembiayaan Islam atau kemudahan kredit oleh koperasi.
10. Penerimaan deposit atau pinjaman wang daripada anggota oleh koperasi."

Kecualian dan peralihan

86. Apa-apa tindakan, peninggalan atau perkara yang dilakukan atau akan dijalankan oleh Ketua Pendaftar Koperasi Malaysia sebelum permulaan kuat kuasa Akta ini hendaklah disifatkan telah dibuat, ditinggalkan atau dijalankan oleh Suruhanjaya dan apa-apa sebutan mengenai Ketua Pendaftar Koperasi Malaysia dalam mana-mana undang-undang hendaklah ditafsirkan sebagai sebutan mengenai Suruhanjaya.

HURAIAN

Rang Undang-Undang ini bertujuan untuk meminda Akta Koperasi 1993 ("Akta 502") menurut Rang Undang-Undang Suruhanjaya Koperasi Malaysia 2006 yang dicadangkan (Rang Undang-Undang SKM).

1. *Fasal 1* mengandungi tajuk ringkas dan kuasa Menteri untuk menetapkan tarikh permulaan kuat kuasa Akta yang dicadangkan.
2. *Fasal 2* bertujuan untuk meminda tajuk panjang Akta 502 untuk mengadakan peruntukan bagi nilai-nilai kejujuran, kebolehpercayaan dan ketelusan koperasi sebagai prinsip yang mengerakkan koperasi. Objektif Akta juga diperluas untuk memasukkan sumbangan ke arah mencapai objektif sosioekonomi negara.
3. *Fasal 4* bertujuan untuk meminda seksyen 2 Akta 502 untuk memasukkan takrif baru dan meminda takrif bagi istilah tertentu yang digunakan dalam Akta.
4. *Fasal 5* bertujuan untuk memotong seksyen 3 Akta 502 memandangkan fungsi Ketua Pendaftar dan Pendaftar akan diambil alih oleh Suruhanjaya Koperasi Malaysia yang ditubuhkan di bawah Rang Undang-Undang SKM yang dicadangkan.
5. *Fasal 6* bertujuan untuk meminda seksyen 5 Akta 502 untuk mengurangkan jumlah minimum anggota koperasi daripada satu ratus orang kepada lima puluh orang anggota.
6. *Fasal 7* bertujuan untuk meminda seksyen 6 Akta 502 untuk menetapkan kehendak yang berlainan bagi pendaftaran koperasi asas, menengah dan atasan.
7. *Fasal 8* ialah suatu pindaan berbangkit memandangkan fungsi Pendaftar diambil alih oleh Suruhanjaya.
8. *Fasal 9* bertujuan untuk memasukkan seksyen baru 10A dan 10B ke dalam Akta 502. Seksyen baru 10A menjadikannya suatu kesalahan bagi mana-mana orang, melainkan jika berdaftar, untuk mengemukakan dirinya sebagai suatu

koperasi atau menggambarkan bahawa dia atau mana-mana orang sedang menjalankan perniagaan suatu koperasi mengikut apa-apa bentuk atau cara.

Seksyen baru 10B menggantikan seksyen 89 Akta 502 dan menjadikannya suatu kesalahan bagi mana-mana orang selain koperasi untuk menggunakan perkataan "koperasi", "koperatif" atau "ko-op".

9. *Fasal 10* bertujuan untuk meminda seksyen 12 Akta 502 dengan menggantikan perkataan "tempat perniagaan" dengan perkataan "cawangan" yang membawa pengertian yang lebih luas di bawah Akta yang dicadangkan.

10. *Fasal 11* bertujuan untuk meminda seksyen 13 Akta 502 untuk memastikan pengawalseliaan yang lebih rapi terhadap koperasi dan untuk menggalakkan ketelusan dalam pengurusan koperasi. Ia juga menjadikannya suatu kesalahan bagi kegagalan untuk mematuhi peruntukan seksyen ini.

11. *Fasal 12* bertujuan untuk meminda seksyen 14 Akta 502 dengan memotong kehendak bagi mengemukakan minit mesyuarat Lembaga kepada Suruhanjaya untuk mengurangkan pengemukakan dokumen yang tidak perlu kepada Suruhanjaya. Minit mesyuarat ini hanya perlu dikemukakan apabila dikehendaki oleh Suruhanjaya. Peruntukan penalti dimasukkan bagi ketidakpatuhan kehendak ini.

12. *Fasal 13* bertujuan untuk meminda seksyen 17 Akta 502. Subseksyen baru (2) dimasukkan bagi memberi Suruhanjaya kuasa, pada bila-bila masa, untuk menghendaki undang-undang kecil koperasi untuk mengandungi peruntukan kerahsiaan atau pendedahan yang dibenarkan.

13. *Fasal 14* bertujuan untuk memasukkan seksyen baru 17A ke dalam Akta 502 bagi maksud menyelaraskan semua undang-undang kecil koperasi dengan Akta 502.

14. *Fasal 15* bertujuan untuk meminda subseksyen 18(4) Akta 502 yang memperuntukkan bahawa apa-apa rayuan terhadap keengganan Suruhanjaya untuk mendaftar apa-apa pindaan undang-undang kecil koperasi boleh dibuat kepada Menteri dalam masa tiga bulan dari tarikh keengganan itu.

15. *Fasal 16* bertujuan untuk meminda seksyen 18A Akta 502 untuk memberi Suruhanjaya kuasa untuk mengarahkan sesuatu koperasi untuk memanggil suatu mesyuarat agung bagi meminda apa-apa ketidakselarasan undang-undang kecil setelah menerima pemberitahuan yang dibuat oleh Lembaganya di bawah subseksyen 17A(3) Akta 502.

16. *Fasal 17* bertujuan untuk menggantikan seksyen 19 Akta 502 dengan suatu peruntukan baru untuk mengawasi penubuhan subsidiari koperasi dan pergerakan dana dalam apa-apa bentuk daripada koperasi kepada subsidiarinya. Ia juga menjadikannya suatu kesalahan bagi kegagalan untuk mematuhi peruntukan seksyen ini.

17. *Fasal 18* bertujuan untuk memasukkan seksyen baru 19A ke dalam Akta 502 untuk menghendaki sesuatu koperasi mendapatkan kebenaran bertulis terlebih dahulu daripada Suruhanjaya untuk membuka cawangan di dalam atau

di luar Malaysia. Seksyen baru yang dicadangkan membolehkan Sumhanjaya mengawasi pembukaan cawangan koperasi. Peruntukan penalti dimasukkan bagi ketidakpatuhan seksyen ini.

18. *Fasal 19* bertujuan untuk memotong seksyen 20 Akta 502 untuk membenarkan anggota melupuskan hasil selain melalui koperasi.

19. *Fasal 20, 21* dan *22* bertujuan untuk meminda seksyen 22, 23 dan 24 Akta 502 untuk memasukkan perkataan "pulangan" dalam peruntukan seksyen ini untuk memenuhi transaksi Islam yang dijalankan oleh mana-mana koperasi.

20. *Fasal 23* bertujuan untuk meminda seksyen 25 Akta 502 dengan menggantikan perkataan "orang belum dewasa" dengan perkataan "kanak-kanak" untuk menyelaraskan Akta 502 dengan Akta Kanak-Kanak 2001 [*Akta 611*].

21. *Fasal 24* bertujuan untuk memotong seksyen 29 Akta 502 bagi menghapuskan sekatan semasa terhadap anggota untuk menyertai lebih daripada satu koperasi yang menyediakan kredit kepada anggotanya.

22. *Fasal 25* bertujuan untuk meminda nota bahu kepada seksyen 31 Akta 502 dengan menggantikan perkataan "Perwakilan" dengan perkataan "Pengundian" kerana perkataan yang kedua lebih jelas dalam menerangkan kandungan peruntukan itu.

23. *Fasal 26* bertujuan untuk meminda seksyen 32 Akta 502 untuk memberi penekanan mengenai kesahan sesuatu kontrak yang dibuat oleh seorang kanak-kanak yang merupakan anggota sesuatu koperasi.

24. *Fasal 27* bertujuan untuk memasukkan seksyen baru 34A ke dalam Akta 502 untuk membataskan liabiliti seseorang anggota koperasi setakat nilai nominal syer yang dilanggannya. Jika dalam undang-undang kecil sesuatu koperasi amaun liabiliti seseorang anggota dinyatakan lebih besar daripada nilai nominal apa-apa syer yang dipegang atau dilangganinya bagi olehnya, maka liabiliti anggota itu hendaklah setakat amaun yang lebih besar itu.

25. *Fasal 28* bertujuan untuk meminda seksyen 35 Akta 502 untuk mengikat liabiliti seseorang anggota lama sesuatu koperasi kepada had yang diperuntukkan dalam seksyen 34A.

26. *Fasal 29* bertujuan untuk meminda seksyen 36 Akta 502 untuk memberi Sumhanjaya kuasa untuk mengeluarkan arahan atau garis panduan berhubung dengan kuasa tertinggi bagi sesuatu koperasi.

27. *Fasal 30* bertujuan untuk meminda seksyen 37 Akta 502 untuk memberi Sumhanjaya kuasa mengeluarkan arahan jika ia berhasrat untuk mengecualikan koperasi tertentu daripada kehendak seksyen ini.

28. *Fasal 31* bertujuan untuk menggantikan seksyen 38 Akta 502 dengan suatu peruntukan baru untuk membolehkan mesyuarat agung permulaan sesuatu koperasi untuk mempunyai kuasa yang sama seperti dalam mesyuarat agung tahunan koperasi.

29. *Fasal 32* bertujuan untuk meminda seksyen 39 Akta 502 untuk membenarkan koperasi mengadakan mesyuarat agung selepas tempoh ketetapan enam bulan sebagaimana yang diluluskan oleh Suruhanjaya. Suatu peruntukan penalti dimasukkan bagi ketidakpatuhan kepada seksyen ini.

30. *Fasal 34* bertujuan untuk menggantikan seksyen 42 Akta 502 dengan suatu peruntukan baru bagi maksud memotong kehendak melantik suatu Jawatankuasa Audit Dalam pada mesyuarat agung tahunan.

31. *Fasal 35* bertujuan untuk memasukkan seksyen baru 42A ke dalam Akta 502 untuk mengadakan peruntukan bagi penubuhan suatu Jawatankuasa Audit Dalam oleh Lembaga sesuatu koperasi, dengan tugas dan tanggungjawabnya seperti yang digariskan dalam undang-undang kecil.

32. *Fasal 36* bertujuan untuk meminda seksyen 43 Akta 502 untuk mengadakan peruntukan bagi kehilangan kelayakan seseorang anggota Lembaga dan memberi Suruhanjaya kuasa untuk mengeluarkan apa-apa arahan atau garis panduan kepada koperasi tertentu untuk menghendaki mereka mendapatkan penentusahan daripada Suruhanjaya sama ada seseorang anggota itu adalah seorang yang layak dan sesuai dilantik sebagai seorang anggota Lembaga.

33. *Fasal 37* bertujuan untuk menggantikan seksyen 44 Akta 502 dengan suatu peruntukan baru untuk menyatakan kuasa dan kewajipan yang perlu dipatuhi oleh anggota Lembaga di bawah undang-undang. Mana-mana anggota Lembaga koperasi yang tidak mematuhi kehendak di bawah seksyen ini melakukan suatu kesalahan dan tertakluk kepada penalti sebagaimana yang diperuntukkan dalam seksyen ini.

34. *Fasal 38* bertujuan untuk memasukkan seksyen baru 44A dan 44B ke dalam Akta 502. Seksyen baru 44A bertujuan untuk menghendaki tiap-tiap anggota Lembaga atau ketua pegawai eksekutif, jika ada, sesuatu koperasi yang mempunyai apa-apa kepentingan dalam sesuatu pembiayaan Islam atau kemudahan kredit untuk diberikan kepada mana-mana orang oleh koperasi itu untuk mengisytiharkan secara bertulis jenis kepentingannya pada suatu mesyuarat anggota Lembaga yang dibentuk dengan sewajarnya.

Seksyen baru 44B bertujuan untuk menghendaki seseorang anggota Lembaga atau ketua pegawai eksekutif, jika ada, sesuatu koperasi yang memegang jawatan atau memiliki sesuatu harta yang, suatu kewajipan atau suatu kepentingan mungkin timbul yang bercanggah dengan kewajipannya atau kepentingannya sebagai anggota Lembaga atau ketua pegawai eksekutif, hendaklah mengisytiharkan hakikat, jenis dan takat percanggahan yang timbul pada mesyuarat pertama Lembaga yang diadakan selepas dia menjadi seorang anggota Lembaga atau ketua pegawai eksekutif, sesuatu koperasi atau jika dia telah pun menjadi seorang anggota Lembaga atau ketua pegawai eksekutif sesuatu koperasi, selepas dia mula memegang jawatan atau memiliki harta yang melaluinya percanggahan itu mungkin timbul.

35. *Fasal 39* bertujuan untuk meminda seksyen 45 Akta 502 dengan memasukkan subseksyen baru (4) untuk mengadakan peruntukan bagi suatu penalti terhadap mana-mana anggota Lembaga yang tidak mematuhi subseksyen 45(1).

36. *Fasal 42* bertujuan untuk meminda perenggan 50(c) Akta 502 untuk memberi koperasi kuasa untuk meningkatkan dana melalui deposit atau pinjaman daripada anggota dan bukan anggota, dengan kelulusan Suruhanjaya. Peningkatan dana ini adalah tertakluk kepada subseksyen 52(1) atau peraturan-peraturan yang dibuat di bawah Akta ini.

37. *Fasal 43* bertujuan untuk meminda seksyen 51 Akta 502 untuk membolehkan sesuatu koperasi memberikan pembiayaan Islam atau kemudahan kredit kepada anggotanya, pekerjanya, subsidiarinya atau kepada koperasi yang lain sebagaimana yang diluluskan oleh Suruhanjaya. Pemberian pembiayaan Islam atau kemudahan kredit itu hendaklah tertakluk kepada arahan atau garis panduan yang dikeluarkan oleh Suruhanjaya dan undang-undang kecil koperasi itu. Larangan dalam subseksyen 52(1) yang dicadangkan tidak terpakai bagi sesuatu koperasi yang dibenarkan untuk memberi apa-apa pembiayaan Islam atau kemudahan kredit dalam perjalanan urusannya sebagaimana yang diperuntukkan dalam mana-mana undang-undang bertulis lain yang menentukan operasinya atau mengikut undang-undang kecilnya.

Fasal ini juga memperkatakan subseksyen 51(3) yang memberi Suruhanjaya kuasa melalui perintah am atau khas, untuk melarang atau menyekat pemberian pinjaman berdasarkan suatu gadaian atau gadai janji harta tak alih oleh mana-mana koperasi atau kelas, kategori atau perihalan sesuatu koperasi.

38. *Fasal 44* bertujuan untuk meminda seksyen 52 Akta 502 untuk membolehkan Suruhanjaya menyekat peminjaman oleh koperasi.

39. *Fasal 45* bertujuan untuk memasukkan seksyen baru 52A ke dalam Akta 502 untuk melarang penerimaan deposit daripada bukan anggota oleh koperasi melainkan jika diperuntukkan dalam peraturan-peraturan yang dibuat di bawah Akta ini.

40. *Fasal 46* bertujuan untuk meminda seksyen 53 Akta 502 dengan memasukkan suatu peruntukan penalti dalam subseksyen 53(2) yang dicadangkan bagi apa-apa kesalahan yang dilakukan oleh mana-mana koperasi atau pegawai sesuatu koperasi yang tidak mematuhi subseksyen 53(1).

41. *Fasal 47* bertujuan untuk meminda seksyen 54 Akta 502 untuk memastikan pelaburan berhemat wang berlebihan koperasi dan untuk mengawal selia pelaburan bon dan debentur oleh koperasi sebagaimana yang diperuntukkan dalam peraturan-peraturan yang dibuat di bawah Akta ini.

42. *Fasal 48* bertujuan untuk memasukkan seksyen 54A ke dalam Akta 502 untuk tidak menggalakkan pelaburan dalam harta tak alih kecuali dalam hal keadaan yang diperuntukkan.

43. *Fasal 49* bertujuan untuk meminda subseksyen 55(3) untuk memastikan kerugian terkumpul dihapus kira sebelum syer bonus dikeluarkan di bawah semua hal keadaan yang disebut dalam subseksyen 55(1). Subseksyen 55(4) dipinda dengan menggantikan perkataan "tetapi boleh" dengan perkataan "kecuali" bagi maksud memperjelas subseksyen itu.

44. *Fasal 50* bertujuan untuk meminda seksyen 57 Akta 502 untuk mengadakan peruntukan bagi penyenggaraan dan pemakaian Kumpulan Wang Rizab Statutori.

45. *Fasal 51* bertujuan untuk meminda seksyen 58 Akta 502 dengan memasukkan suatu subseksyen baru (6) ke dalam seksyen 58 untuk mengadakan peruntukan penalti bagi ketidakpatuhan subseksyen 58(1), (2), (3) atau (4) oleh mana-mana koperasi atau pegawai sesuatu koperasi.

46. *Fasal 52* bertujuan untuk meminda seksyen 59 Akta 502 dengan memasukkan suatu subseksyen baru (2A) untuk menghendaki sesuatu koperasi mengambil kira semua pandangan Suruhanjaya yang mempunyai kesan kewangan terhadap akaun teraudit dan kunci kira-kira koperasi yang hendaklah diselaraskan dan ditunjukkan dengan jelas di dalam akaun teraudit koperasi dalam tahun kewangan yang berikutnya.

Fasal ini juga bertujuan untuk memasukkan subseksyen baru 59(6) ke dalam Akta 502 untuk mengadakan peruntukan penalti bagi mana-mana koperasi atau pegawai koperasi yang tidak mematuhi subseksyen 59(1).

47. *Fasal 53* bertujuan untuk meminda seksyen 60 Akta 502 untuk mengadakan peruntukan bagi akaun tiap-tiap koperasi diaudit dalam tiap-tiap tahun kewangan oleh seorang juruaudit yang diluluskan oleh Suruhanjaya atau seorang pegawai Suruhanjaya.

48. *Fasal 54* bertujuan untuk meminda subseksyen 61(1) Akta 502 untuk memastikan bahawa seksyen ini selaras dengan cadangan pindaan dalam seksyen 60. Subseksyen 60(3) dipinda untuk memberi Suruhanjaya kuasa untuk membatalkan pelantikan seseorang juruaudit yang dilantik di bawah seksyen ini sekiranya pada pendapat Suruhanjaya, audit yang dijalankan tidak memuaskan.

49. *Fasal 55* bertujuan untuk memasukkan suatu perenggan baru 62(aa) ke dalam Akta 502 yang memperuntukkan bahawa seseorang itu tidak boleh menjadi seorang juruaudit sekiranya dia ialah seorang anggota sesuatu koperasi atau suami atau isterinya ialah seorang pegawai koperasi itu. Subseksyen baru ini dimasukkan untuk memastikan tiada percanggahan kepentingan antara tugas juruaudit dengan koperasi. Perenggan 62(e) dipinda untuk menghilangkan kelayakan seseorang juruaudit jika dia pernah dikompaun dengan mana-mana kesalahan di bawah Akta 502.

50. *Fasal 56* bertujuan untuk meminda seksyen 63 Akta 502 dengan memasukkan suatu peruntukan penalti ke dalam subseksyen (6) yang dicadangkan bagi ketidakpatuhan seksyen ini.

51. *Fasal 57* bertujuan untuk meminda seksyen 64 Akta 502 untuk menambah kuasa Suruhanjaya untuk menyiasat perbadanan berkaitan sesuatu koperasi. Suatu proviso dimasukkan ke dalam seksyen 64 Akta 502 untuk memastikan bahawa apa-apa pemeriksaan yang dijalankan oleh Suruhanjaya tidak mengganggu urusan sesuatu koperasi. Proviso ini membolehkan Suruhanjaya memeriksa buku, akaun, dokumen, sekuriti dan wang tunai pada bila-bila masa atau di mana-mana tempat yang tidak boleh mengganggu perjalanan yang sepatutnya urusan harian biasa koperasi itu atau perbadanan berkaitannya.

52. *Fasal 58* bertujuan untuk meminda seksyen 65 Akta 502 untuk memberikan Suruhanjaya atau pegawainya kuasa untuk memasuki mana-mana premis atau tempat yang dipercayai dapat membantu pemeriksaan atau penyiasatan, untuk memberikan kuasa untuk menyita atau menahan apa-apa dokumen bagi maksud pemeriksaan atau penyiasatan dan untuk meluaskan kuasa Suruhanjaya dalam mendapatkan dokumen daripada koperasi atau pegawainya. Suatu peruntukan penalti dimasukkan ke dalam subseksyen 65(3) yang dicadangkan bagi ketidakpatuhan seksyen ini.

53. *Fasal 59* bertujuan untuk meminda seksyen 66 Akta 502 untuk memperluas skop penyiasatan oleh Suruhanjaya untuk merangkumi juga perbadanan berkaitan sesuatu koperasi.

54. *Fasal 60 dan 61* bertujuan untuk meminda seksyen 69 Akta 502 dan untuk memasukkan seksyen baru 69A, 69B, 69C dan 69D ke dalam Akta 502 untuk memberi Suruhanjaya kuasa untuk mengambil tindakan tertentu berkenaan dengan sesuatu koperasi yang bermasalah atau pegawainya sebagaimana yang diperuntukkan dalam hal keadaan yang disebut dalam seksyen itu.

55. *Fasal 63* bertujuan untuk menggantikan seksyen 71 Akta 502 dengan suatu peruntukan baru yang memberi Suruhanjaya kuasa untuk membubarkan sesuatu koperasi dalam hal keadaan yang diperuntukkan.

56. *Fasal 64* bertujuan untuk memotong seksyen 71A, 71B dan 71c Akta 502. Peruntukan ini telah dimasukkan bagi membolehkan sesuatu koperasi ditubuhkan semula sebagai suatu syarikat, pembahagian aset kepada mana-mana anggota yang tidak bersetuju dengan penubuhan semula sesuatu koperasi sebagai suatu syarikat dan untuk memudahkan pemindahan aset koperasi itu kepada syarikat pengganti. Dengan memotong peruntukan ini sesuatu koperasi dilarang daripada ditubuhkan semula sebagai suatu syarikat.

57. *Fasal 65* bertujuan untuk meminda seksyen 72 Akta 502 untuk memberi Suruhanjaya kuasa untuk membatalkan pendaftaran mana-mana koperasi jika terbukti Suruhanjaya berpuas hati bahawa bilangan anggota koperasi itu telah dikurangkan kepada kurang daripada lima belas orang.

58. *Fasal 67* bertujuan untuk meminda seksyen 74 Akta 502 sebagai pindaan berbangkit daripada pemotongan seksyen 71 A dan untuk memberi Suruhanjaya kuasa untuk melantik pegawainya sebagai seorang pelikuidasi koperasi.

59. *Fasal 68* bertujuan untuk meminda subseksyen 75(2) Akta 502 dengan menggantikan perkataan "koperasi kredit" dengan perkataan "koperasi ditetapkan" bagi memperluas kategori koperasi yang seseorang pelikuidasi sesuatu koperasi adalah dilarang daripada mengeluarkan apa-apa pinjaman.

60. *Fasal 69* bertujuan untuk meminda seksyen 77 Akta 502 yang memperuntukkan sesuatu perintah yang dibuat oleh pelikuidasi, atau oleh Suruhanjaya di bawah seksyen 75 atau 76 hendaklah dikuatkuasakan oleh mana-mana mahkamah. Ini akan memudahkan koperasi atau mana-mana orang yang berkenaan untuk menguatkuasakan perintah yang dibuat oleh pelikuidasi atau Suruhanjaya itu.

61. *Fasal 70* bertujuan untuk meminda subseksyen 79(1) Akta 502 dengan memotong perkataan "modal" untuk menjadikan suatu peruntukan itu lebih jelas.
62. *Fasal 71* bertujuan untuk meminda subseksyen 80(1) Akta 502 untuk memperluas alasan Suruhanjaya bagi mengenakan surcaj kepada pegawai sesuatu koperasi untuk memasukkan dapatan yang diperoleh daripada penyiasatan di bawah Bahagian VI Akta Suruhanjaya Koperasi Malaysia 2006. *Fasal* ini juga bertujuan untuk meminda subseksyen 82(2) untuk memberi Mahkamah Sesyen kuasa untuk menguatkuasakan suatu penghakiman melebihi RM250,000.00.
63. *Fasal 73* bertujuan untuk memasukkan perenggan baru %2(3)(ba) ke dalam Akta 502 untuk memberi Suruhanjaya kuasa untuk merujuk apa-apa pertikaian yang berada di bawah subseksyen 82(1) Akta 502 kepada tribunal yang ditubuhkan di bawah seksyen 83.
64. *Fasal 74* bertujuan untuk meminda subseksyen 83(2) Akta 502 dengan menggantikan perkataan "hendaklah" dengan perkataan "boleh" yang tidak menjadikannya wajib kepada Suruhanjaya untuk merujuk semua pertikaian kepada tribunal jika Suruhanjaya itu sendiri boleh memutuskan pertikaian itu.
65. *Fasal 75* bertujuan untuk memasukkan seksyen baru 84A ke dalam Akta 502 untuk membolehkan Suruhanjaya mengawasi mana-mana koperasi yang menjalankan perniagaan atau aktiviti berasaskan Syariah.
66. *Fasal 76* bertujuan untuk memasukkan seksyen baru 85A ke dalam Akta 502 untuk membolehkan Suruhanjaya menghendaki daripada koperasi maklumat dan statistik, pulangan atau dokumen dalam masa dan cara sebagaimana yang boleh dikehendaki oleh Suruhanjaya secara bertulis.
67. *Fasal 77* bertujuan untuk meminda seksyen 86 Akta 502 untuk meluaskan kuasa Suruhanjaya untuk membuat peraturan-peraturan, dengan kelulusan Menteri, untuk membantu Suruhanjaya mengawal selia operasi koperasi dengan lebih berkesan.
68. *Fasal 78* bertujuan untuk memasukkan seksyen baru 86A dan 86B ke dalam Akta 502 untuk memberi Suruhanjaya kuasa untuk membuat perintah dan mengeluarkan arahan atau garis panduan bagi membantu Suruhanjaya untuk mengawal selia operasi koperasi dengan lebih berkesan.
69. *Fasal 79* bertujuan untuk meminda seksyen 87 Akta 502 untuk memberi Menteri kuasa, sama ada melalui perintah am atau khas, untuk mengecualikan mana-mana koperasi atau kelas, kategori atau perihalan koperasi daripada mana-mana peruntukan Akta ini atau mengarahkan bahawa peruntukan sedemikian hendaklah terpakai bagi mana-mana koperasi, kelas, kategori atau perihalan koperasi berkuat kuasa dari apa-apa tarikh atau dengan apa-apa ubah suaian sebagaimana yang dinyatakan dalam perintah. Mana-mana pengecualian yang dibuat hendaklah disiarkan dalam *Warta*.
70. *Fasal 80* bertujuan untuk memotong seksyen 89 Akta 502 memandangkan seksyen ini dimasukkan di bawah Bahagian II Akta ini sebagai seksyen 10B.

71. *Fasal 81* bertujuan untuk meminda seksyen 91 Akta 502 mengenai kesalahan am.
72. *Fasal 82* bertujuan untuk meminda seksyen 92 Akta 502 untuk menyelaraskan peruntukan ini dengan seksyen 62 Akta Suruhanjaya Koperasi Malaysia 2006.
73. *Fasal 83* bertujuan untuk meminda seksyen 93 Akta 502 untuk memberi Pengerusi Eksekutif Suruhanjaya kuasa, dengan keizinan Pendakwa Raya secara bertulis, untuk mengkompaun apa-apa kesalahan yang boleh dihukum di bawah Akta ini, peraturan-peraturan atau perintah yang dibuat di bawah Akta 502.
74. *Fasal 84* bertujuan untuk memasukkan seksyen baru 93A ke dalam Akta 502 yang memperuntukkan bahawa jika sesuatu koperasi atau mana-mana orang telah disabitkan atas suatu kesalahan di bawah Akta ini, mahkamah boleh, sebagai tambahan kepada mana-mana denda atau tempoh pemenjaraan yang boleh dikenakan, memerintahkan koperasi atau orang itu untuk membetulkan pelanggaran Akta ini yang berkenaan dengannya koperasi atau orang itu telah disabitkan.
75. *Fasal 85* bertujuan untuk memasukkan Jadual baru ke dalam Akta 502.
76. *Fasal 86* mengandungi peruntukan kecualian dan peralihan.
77. Pindaan lain yang tidak diperkatakan dengan khusus dalam Huraian ini merupakan pindaan yang kecil atau berbangkit.

IMPLIKASI KEWANGAN

Rang Undang-Undang ini tidak akan melibatkan Kerajaan dalam apa-apa perbelanjaan wang tambahan.

[PN(U²)2483]